



吳門補乘 五



內閣文庫	漢書
九	〇九
函	八
架冊號類	

內閣文庫	
番號	漢 9098
冊數	8 (4)
函號	292 19



吳門補乘卷五

吳縣錢思元宗上輯

男士錡校

淺草文庫



後漢

人物補 意祇在乎闡幽義無取乎求備苟一長之足錄咸採列於斯編史辰伯云人物志殊難稱意是在纂修者擇而取之耳至蓋棺論定自古為然此後名賢更當續補

澹臺敬伯會稽人薛漢弟子漢以韓詩教授敬伯最知名 後漢書儒林傳。時

當永平間未立吳郡。錡按漢順帝永建四年始分會稽置吳郡

晉

顧顯字孟著吳人榮兄子少有重名泰興中為騎郎早卒時人悼惜

之世說新語註
志附榮傳

吳門補乘卷五 人物補

宋

顧邁吳郡人輕薄有才能除始興王濬征北府行參軍濬待之厚為

劉瑀排擠徙廣州

約南史劉穆之傳

齊

顧愿字子恭吳郡吳人

深之子

好學有才辭覬之嘗命愿作定命篇

卒於太子舍人

南史顧覬之傳

大明中舉秀才對策稱旨擢著作佐郎早

卒

通志

顧惠胤宋鎮軍將軍覬之弟子也

覬之吳郡吳人

閑居養志不應徵辟永明

三年以驃騎參軍徵為司徒主簿

南齊書顧歡傳

張寶積融第六弟也

融吳郡吳人見志

建武中出為廬陵太守時名流謝滄

何點陸惠曉孔珪至融弟鐵之舍點造坐便謂寶積曰阿六張氏

保家之子永元中為湘州行事蕭穎胄在江陵寶積乘腰輿詣穎

胄舉動自若穎胄問何至之晚荅曰本朝危亂四海橫流既不能

為比干之死實未忍為微子之去是以至晚穎胄深以為善即用

為相府諮議後位御史中丞

南史張融傳

何撰胤子也胤隱虎邱山撰亦不仕有高風

南史何胤傳

梁

蕭思遇字望明武帝從孫性簡靜慕道不樂仕進居虎邱東山

廣博物志

陳

張沖之光祿大夫種孫也少孤介特立仕為尚書金部郎中遷右丞

建康令太府卿揚州別駕從事史兼散騎常侍使於周還為司農
廷尉卿所歷並以清白稱

陳書張種傳。種見吳縣志。

唐

張無擇字無擇吳郡人未冠丁父憂廬於墓晝號而夜泣者三年有
靈芝醴泉出焉既冠從鄉試登經第應制科中精通經史科調絳
州錄事參軍絳有主胥者怙寵侮法豪奪人利數其罪露章奏之
丞相姚元崇奇之致書褒美累擢和州刺史無擇在郡奉詔條恤
人隱而已無何水潦害農無擇請蠲穀籍之損者什七八時李知
柔為採訪使素不快無擇之剛直密疏誣奏以附下為名遂貶蘇
州別駕老幼遮道攀泣信宿乃去移曹州謝病歸老於家

白居易墓誌

張誠字老萊無擇子年十八以通經中第及調判入高等官左武衛
騎曹參軍分司東都屬安祿山亂以偽職脅劫士庶誠與同官范
陽盧巽遁於陸渾山食木實飲泉水者二年迄不為偽命所污及
肅宗嗣位詔河南尹搜訪不仕賊庭退藏者得六人以應詔誠與
巽與焉由是名節聞於朝野優詔褒美特授密縣令遷礪山縣令
時睢陽當大兵後野無草里無人誠撫之一年襁負至二年汚萊
闢三年衣食足及解印去民相率泣而送之嶺南節度觀察使李
勉遂奏授試大理評事充觀察推官及除書到門即誠捐館之日
也

白居易墓誌。○銜按誠見府志吳縣志選舉表

顧師筮字睦之少連子性恬約喜書寡合第進士

見選舉表累遷監察御

史李訓薦為水部員外郎翰林學士訓遣宦官田全操等按邊既行命師邕為詔賜六道殺之訓敗不果師邕流崖州賜死藍田新唐

書○錡按吳縣志少連傳師邕長慶進士歷官翰林學士

陸洧自右拾遺除司勳郎中棄官隱吳中詔召之既在道歐陽和簪

遺書讓其出處之遠洧不至還新唐書歐陽詹傳○錡按雲溪友

暢為江西王仲舒從事舉洧自代又金陵志唐禹穴碑鄭昉撰元稹銘韓梓材行書陸洧篆額今志陸洧祇見第宅門

魚處士逸其名隱居虎邱山趙嘏嘗贈以詩全唐詩

按周朴字大朴列朝詩選唐詩別裁集俱作吳興人江南通志誤入吳縣

後五代

呂知隱於洞庭山穿一松逕造草舍而居寶正中徵起鶴氅紗巾見

武肅甚奇之善星緯識地理多術數聞奇錄

宋

錢文炳蘇州節度使元璟猶子也為元帥府判官檢校禮部尚書周

顯德中入京供奉飽文學善應對尤精青鳥之術宋開寶五年卒

羅泌路史○元璟乃武肅王之子廣陵王也

米珣字永叔吳中隱君子也鄉人罕識之章丞相棗程光祿師孟皆

縣人特與之善張泉吳中人物志

孫實字若虛早年英聲藉甚性好滑稽嘗集書語譏一郡庠老生教

授朱長文知之命其父訓飭實由此發憤不數歲登第為寺丞後

守台州

中吳紀聞。錡按實登元祐三年李常寧榜吳縣人見府志選舉表其人輕薄不足取以其早擅英聲且能發憤故

錄之。按潛研堂金石文跋尾續虎邱劍池石壁有孫實等題名時為元符三年

葉善卷清臣之孫官寺丞長於詩

中吳紀聞葉參條註

陸子正郡人授業尹焞之門莆田林光朝試禮部不第來從子正遊

專心聖賢踐履之學

吳中人物志

散髮書生佚其姓氏居洞庭山每科頭披髮故名散髮書生時高宗

南渡金兵日迫賴岳武穆韓蘄王張魏公輩分兵統護生每從田

夫野老訪問邊警若語之曰金兵敗則喜動顏色若曰我師敗則

悲不自主仰天大叫輒至嘔血後病死有書一篋人發而觀之則

史記一部旁有小楷評註所論皆獨出意旨今其書不傳

李玉中稗聚

范寅孫姑蘇人文正公會孫紹興十七年為平陽丞才敏而勤急於

民事興修水利人胥賴之崇祀名宦祠其題邑白雲山藤道詩云

峻極藤為道盤旋百轉多崖懸枯樹杪澗折怪巖阿雁入雲霄去

猿從荆棘過誰云西蜀險較此更如何

平陽縣志。列傳例不載詩文恐其久而失傳故錄

之下
倣此

陳長方字齊之號唯堂其先長樂人父侁字復之娶吳人林旦女嘗

從游定夫學得治身養心行已接物之道故長方亦為道學之士

長方生長外家紹興中舉進士授江陰教授尋歸居吳中步里

在郡

城東南隅今名步前終日閉戶研窮經史有書名步里客談又有漢唐論俱

行於世弟少方字同之亦端慧不羣號二陳

中吳紀聞參盧熊志按中吳紀聞林氏

本福清人徙居吳門又按王志堅府志臺林且住帶城橋長方始則生長外家繼且卜居步里是其為長洲人而無與於吳江也明矣長洲志失載吳江志混入今正之

蘇福吳人也有奇才八歲時父命賦新月福應聲曰氣朔盈虛又一初嫦娥底事半分無碧紗籠就青銅鏡一幅先天太極圖父大稱賞應試輒不遇便超然名利慕古夏黃公之名徙居洞庭之慈里灣流連山水諷咏竟日與其友陸子羽田山人隱居弗出後二人應張魏公之命出為河南府推官益子然無侶時於風雨中獨乘扁舟往來湖中以洞庭本西山乃倣孔稚圭北山移文作西山移文以致諷二人焉見聞雜記

武如愚其先開封著姓南渡後定居姑蘇如愚早孤依故人龔相相為

頤正之父吳縣人

能刻勵於學業文詞以祖澤入官

吳中人物志

王大受字仲可號易齋居吳門與王枏同里

枏吳縣人見府志

父克明名醫

遇病雖數症只下一藥曰此病之本也本除而餘病去矣大受為葉適門人與子有成樓昉漢輔卿客于衛涇門下又與儲用項安世周師稷劉翰王輝王清明為金陵留守吳琚之客皆一時知名士琚得大受最晚輟子姪官授之初徐誼以忠被遣徙南安勢洶洶未已大受謀薄誼罪即移袁州方議再移會使臣蔡璉妄言牽引大受調護從容尋歸故郡於是胡紘劉德秀等架造險語且欲株陷良人大受又請琚白太后諭外廷毋更論往事時韓侂胄欲遣使議和而難其人欲用大受大受謂敵人以首謀為言通軍前

書宜勿用平章銜以丞相代之原註謂陳自強敵問首謀則荅以今已避

位蓋至計也侂冑疑其建明漸廣不能從尋為越錢清之煎鹽人

目為王煎鹽與同官樓鏞不相能互申倉司章燮聞於侂冑遂謫

邵武後侂冑玉津園之誅大受與趙汝談皆與始謀至書所欲行

之事於掌幸不敗爾題李璧石林居詩云君不見牛奇章與李衛


公二人生平不相容門前冠蓋互咿軋惟有愛石心則同有易齋

詩葉適為之序稱許過於四靈葉紹翁四朝聞見錄七條合纂

李杞字木川平江人時朱文公去國寓西湖靈芝寺送者漸少杞獨

從容叩請得窮理之學有紫陽傳授行於世同上

朱希顏字景淵蘇州吳人寧宗朝自揚州教授遷知歸安立類帖以



簡催科勸義役以均使令置田飯囚捐俸賑飢善政甚多烏程褚

氏女奴竊藏以逃其父懼及迫之溺死以訟褚氏疑不能明郡以

是屬之希顏一問得其情遠近駭服秩滿晉福建轉運司主管文

字尋通判湖州湖經總制額特重會前政多故吏滋為奸期會稽

違督責日峻希顏即與所部約截為期而除宿負度宜定數而減

虛額屬部欣然力省而事集未幾主管建昌仙都觀湖州府志名宦傳

陳昌世為人端慤父振字震亨居吳門無子延昌世於家塾每加敬

愛因嗣為後昌世以澤入仕嘗倅三衢攝郡於公帑纖毫無所取

淳祐間擢為郎癸辛雜誌。按廬熊府志振崑山人此云居吳門殆自崑來徙者昌世廬志但言振子未及繼嗣事

師餘字學翁其先眉州人父曾定仕蘄州教授嘉熙間東入吳遂為

吳人餘少失怙恃自勵於學清修力行世味泊如開門講授執經者甚衆平生所爲詩文多不存稿晚歲有樓裂集一卷

吳中人物志。樓裂

府藝文志作縷裂

沈埠號勝山世居吳城咸淳中鄉貢進士宋亡不仕隱居長洲縣黃

埭村晚年德益純其所居處至今尚名沈巷云

沈氏家譜埠好學自勵

兼善治生晚業鼓鑄以資雄一方生平以禮義自持閭閻細民有

失所者必多方扶掖不遺餘力焉

明毛理重修墓記

陸逸字蘭坡予同里人也工於論咸淳末郡庠月試每居余前余嘗

謂蘭坡曰論縝密我不如子蘭坡曰賦工緻我不如子彼此相觀

而善

俞玉吾書齋夜話俞西洞庭山人見志

施岳字仲山吳人僑居武林精於律呂

湖山勝槩

鄭虎臣名景召以字行居鶴舞橋東以貲雄於鄉自奉奢侈德祐元

年翁合等交章劾奏賈似道積惡滔天詔循州安置遣使監押之

貶所虎臣時爲會稽縣尉以父嘗爲似道所配欲報之欣然請行

時似道寓建寧之開元寺侍妾尙數十人虎臣至悉屏去撤轎蓋

暴行秋日中令舁轎夫唱杭州歌謔之每名斥似道窘辱備至一

日入古寺壁上有吳潛南行所題字虎臣呼似道曰賈團練吳丞

相何以至此似道慚不能對舟次南劍州黯淡灘虎臣曰水清甚

何以不死於此似道曰太皇許我不死候有詔卽死十月至漳州

木棉庵虎臣曰吾爲天下殺似道雖死何憾遂拘其子與妾於別

館卽厠上拉其胷殺之陳宜中至福州捕虎臣斃於獄

通鑑綱目參盧熊府

志第宅門。錡按似道蠹國殃民其罪擢髮難數所謂亂臣賊子人人得而誅之者朝廷不能明正其罪天特假手虎臣以殺之綱目於似道則不書爵其惡之也深矣於虎臣則書曰監押官其子之也甚矣且爲父復仇不失爲孝子爲吳丞相及天下百姓洩公憤不失爲義士明游朴木棉庵詩云淒淒木棉庵賈相此裂腹矯矯鄭虎臣手代天行戮蓋詩史也世儒無知人論世之識而猥以擅殺責之故特爲立傳以洗其不自之冤而明千古是非之正

欽德載吳縣人仕宋爲都督計議官宋亡不肯送降欵元兵募生致

其人議欲官之德載遁居碧巖山中因號壽巖老人

按何氏姓苑以爲吳人又

峴山志程學顏曰嘉容洞流寓諸賢宜增祀欽德載是欽爲長興寓賢無疑或以爲長興土着則謬矣

元

秦欽字敬之西洞庭人宋亡隱居不仕故人趙子昂送歷日謝之以

詩曰野人無歷也知春多謝王孫歲月真六十餘年藏甲子今朝

愁見舊時新子昂大慙

足徵集

徐清寧大德間隱居張林西山子文禮字和甫父歿廬墓沈壽寧有

碑記相傳趙孟頫書今斷碑置山上文昌廟壁

陳惟中甫里志

龐隆字兆康號石舟姑蘇人官著作郎元末隱姓名游江湖後遷居

湖之西崦山構臥雲堂因作臥雲歌云白雲悠悠滿空谷道人掃

雲山中宿江湖龍戰迥不聞獨向窩中睡正熟洞門沈沈春滿牀

去來只在白雲鄉睡甜不怕衣裳冷夢覺方知枕簟涼須與雲去

無畱跡門外落花紅覆石道人起來著雙屐孤鶴一聲四山碧所

著有石舟集

湖州府志

吳門補

卷五

九

人物補

明

盛逮字景華號默庵繼改居密似祖子劉鳳續先賢讚逮父以元季

張士誠據蘇逮所善唐自牧負官糧二百餘石自度不能償恐困

笞辱來與逮訣逮驚謂曰用幾何可乃曰須銀百兩即與之如數

自牧得不死洪武初有薦之者高皇帝召見賜冠帶襲衣命議事

於兵部逮處斷剛正尚書陳寧忌之因稱疾歸國初兵下姑蘇似

祖先出圍城局舍中圖書器玩託鄰家守視而鄰之奴竊之家人

欲質於官逮曰幸父子獲全物無足計後陳寧為蘇州知府徵丙

午所負糧烙鐵征逋刑甚慘酷人稱為陳烙鐵亟詢逮欲一見眾

亦勸往逮曰彼以酷立威重欺罔其能免乎避之不見寧怒命司

通區逋賦責其督賦時民方脫兵燹食且不給惶惶待罪逮傾資

代償至十餘石里人曰吾輩豈可重累長者於是相率稱貸不月

告足寧莫能加害未幾寧果敗人稱逮先見弟章按吳江志逮以

亦字行章嘗坐鹽法逮捕甚急似祖憐章年少不忍遣逮請曰弟

未有子某有子可行遂就捕至京得從輕論成寧夏時地方新定

荆榛骹骼蔽野塞途斗米千錢人饑困多疾疫逮以醫藥濟之全

活者眾故舊同在戍所者多依之飲食曾無倦意嘗道經西寧山

中聞哭聲哀詢之乃父母同死貧無以殮逮惻然傾囊濟之主人

拜問姓名不告而去戍久念兩親日老南望流涕越十九載始得

歸省未浹旬母鄧卒又五年復歸省而父卒皆得視含殮人以爲

孝義所致前元戶部侍郎李幹洪武初為陝西省郎中兼秦府參軍以事戍寧夏與逮友後受慶府薦為翰林待詔年八十餘請老無家知逮還蘇來依焉逮延教諸孫逾數年疾作告逮曰吾老死無所歸因而淚下逮曰無憂倘不幸必葬吾先人墓側幹舉手加額而終逮具棺衾葬於黃山先塋之右俾孫之受業者持其喪至今不廢享祀按李幹事見府志鄉人周伯恭久客淮以病歸蘇告逮曰聞君高誼用託死生逮忻然納之食飲藥石罔不具備歲餘而卒亦具衣棺葬之平日賑給困窮患難及婚喪不能舉者多類此陸壽太平廣記○按逮見吳江志人物傳稱一都人其父似祖有行義始居郡中子孫遂占籍長洲是宜入長洲府志入吳江非是○續吳先賢讚逮游秦晉間遇異人授方為之有效年至九十餘

黃本字中父

作本中

蘇郡人張氏據吳本自郡徙吳江同里遂家

焉洪武中舉明經為武夷訓導歷會昌教諭有文名研極經史百

家詩文亦藻麗豐腴稿多散佚識者惜之

吳中人物志合纂

王勝祖字景德居包山洪武初家素封嘗被盜已而盜就擒子弟欲

聞之官勝祖廉得其情憐而釋之其人感激願沒其子為奴仍笑

而遣之年五十謝絕人事不茹葷足不下樓者十七年

王銓墓表

王勝字紹先西洞庭山人好讀書家貧躬耕以養父母會元明之際

海內多事絕意仕進洪武中舉賢良方正授臨淄令時臨淄薦饑

流離載道勝至設法賑濟復力請臺司蠲歷年租稅民困乃甦性

剛毅不可屈勢家有干以私者輒拒之曰吾布衣得官固當奉職

奈何壞朝廷法乎以此大忤朝貴乞骸骨歸放浪山水以終孫守
成字若谷工詩文寄籍太康嘉靖初歲貢後歸洞庭以文章倡率
後進與門弟子講解終日不倦葉初春秦嵩蔡雲程輩皆其所造
就也晚歲益潛心性命之學五世孫名儒以孝友稱

縮林屋民風
六世孫維

德字鴻緒即著
林屋民風者

沈玠長洲周莊人洪武初以人材擢奉訓大夫戶部倉曹員外郎不
受祿繼有旨願受者聽玠辭曰念臣一門屢蒙恩宥保有妻孥田
廬已踰素望又居尊官榮逮父祖敢更受祿哉叩謝至再初吳中
首稱沈氏曰萬三公萬四公昆季以力農致富埒古素封者其稅
率先兩浙戶家輸其稅者萬上嘗嘉歎後復獻白金以佐國用上

善而却之比任海內戶家為京官六曹近侍各舉所知惟玠簡在

帝心故首擢是職玠為萬四公會孫

曹

吳中人物志。玠附見長志
施宗義傳僅云以人才官倉

沈仲昇宋貢士埠曾孫居虎邱半塘嘗捐貲築下塘通衢凡七處造

虎邱塔輪鑄金山銅像子孟迪年十六掌邑中稅務時吳中數饑

民多逃亡官責逋賦孟迪盡鬻已田八十頃為之代償今名沈家

田及東西郭氏世業者是也

毛理沈勝
山墓記

周立字公禮號拙逸洪武初

明詩綜編
入成化中

長洲人為吳淞六老之一句

有江楓葉落紅銷樹野水冰生白滿田清雅可誦其行經華陰七

律尤膾炙人口

明詩綜明詩別裁
集甫里志合纂

俞仲良長洲人司寇士悅父素寬厚嘗一日自外歸見有偷兒方竊其家堂前錫燈檠仲良迴避俟其袖出乃入後家人以失器告仲良曰此器久不堪用吾已與錫工新之矣後竟復買終不令家人知之又嘗宴客客有貧者飲畢袖其銀盃其妻屏後見之呼仲良入告以故令檢之仲良笑曰酒器夜來吾已廢其一汝何視之誤耶同時吳縣陳僖敏公鑑之父孟玉為人愿慤亦稱善士都穆譚纂王所

釋史彙編。錫按偷兒竊錫燈檠一節與黃魯曾吳中往哲記小異記云丐者竊家堂佛像一軀僮僕遇之辱毆不已仲良解之曰此子三日前借以為模式予曾約今日與也亟令其去丐遂轉售得米

沈祥字兆興通經史洪武時以博士徵不就避居甫里子泓字孟新徵授新昌縣令廉謹有守九載秩滿告歸進士鍾鏗皆其後也顧時

鴻甫里志

蘇叔瑜郡人性至孝洪武中戍雲南未幾母卒戍所叔瑜請於官奉母骨從雲南抵蜀江登舟人不知其有母骨也忽江濤怒激舟欲覆或指江蛟有所觸同舟者盡恐叔瑜不得已懷母骨登陸緣山嶺越三日夢一叟語之曰江行不危母恐也叔瑜驚覺思其語乃復就舟江波帖然竟得葬母於鄉譚纂

徐濟吳縣人達左兄子洪武中知邵武府工楷書達左司訓建寧寫武夷九曲權歌圖一時名流題句卷後者凡十八人濟與王璩續題於後蓋亦長於韻語也明詩綜邵武府志合纂

陳淵吳縣人洪武中以人材知慶陽府安化縣持已清廉施政有序

後陞九江府同知嘉靖陝西通志

錢添字安道吳縣人父仲德字脩伯武肅王十四世孫元末進士官

至參政歸隱蘇州九龍山塢自號薦福山農是為吳城始祖添洪

武二十六年從軍四川任建昌衛守禦澧州中所千戶征蠻有功

封昭信校尉弟兼字兼善洪武中舉人材任光祿寺大官監事賜

銀章曰忠孝子孫卒贈少卿其後又有應選廷選士選者應選字

養恬崇禎庚辰辛巳間歲歉傾家賑濟當事旌其門曰世德善廬

廷選字養恒士選弟孝友無間勤儉治家歲凶竭貲以賑不少吝

士選字振寰天啟辛酉武舉吳縣志作崇禎癸酉官欽依守備宿松征流寇

有功子孫世襲蘇州衛總旗家譜吳城支陸墓支。余宗聚處太湖之濱去九龍山塢才二十里而近

此數人者疑即吾家一支然世系無徵未可強附姑錄於此以俟考之他書

王敬蘇州人洪武中兄犯大辟敬請代上許之侯甸野記。鈺按明紀實錄永樂八年蘇

州妖婦鄒氏誣降邪神法當絞其子梁阿柱累乞代死左都御史陳瑛據情入啟皇太子曰此亦人情所難可特以子之故曲宥其

死事與此類

蘇人有為嘉定縣吏者洪武末郡中一人以事誑誤至縣潛白吏求

助直之吏曰今上自郡守下至縣首領官皆廉公奉法吾曹亦罔

不戒謹豈敢私出入文牘耶然若事既直第公聽之決無枉抑其

人如教果獲申雪感吏情以米二石餽之吏固却久之此人竟不

肯已吏曰我以鄉曲故為君受一斛鄉人別去後半載假歸以原

米奉鄉人之母曰此若兒向寄我處今以還母侯甸野記

張真蘇州人洪武末知諸暨縣性鎮重廉介是時縣始去兵民稍營聚而湖山間土最瘠以賦重皆棄不耕元知州馮翼請蠲賦乃始佃墾至是司國計者欲履畝升科百姓憂懼真持不可以身為請乃得減其賦額至今賴之萬歷紹興府志

劉敷長洲人以禮季子也

以禮見長洲志

學通諸經各為之疏人稱經師永

樂初累辟不應從孫海漢陽決曹有廉稱

劉鳳續吳先賢讚。長洲志敏敬政皆敷兄也敷

乃鳳高祖故先賢讚及之

錢中字文則吳人讀書有通敏才雅善琴尤精祿命之說性狷介寄跡委巷不改其樂子紳郡邑志有傳

吳中人物志。中附見府志子紳傳僅云善琴餘無所及

黃忠蘇州衛百戶平日慎飭勤銳每考最永樂間領海運勤於王事

不憚辛鞠有功升鎮撫然大洋浩浩幾覆沒者屢竟客死憂怖之

中無子弟信繼領其務颶風昏霧苦難萬狀亦就木於羈旅幸而

已有子至今子孫繁衍蓋海運雖險而自劉家河不數日可抵直

沽比之道聞河越洪壩經年瘁澁者不同所以序勞績者無過焉

信四世孫魯曾省曾

黃魯曾續吳中往哲記

周仲達長洲青邱人

今分隸元和

隱居不仕館甥高啟往依之後啟死門

人呂勉痛其師死非辜徙居城外絕口不道文事永樂中時禁稍

弛始出其師諸稿以傳

周復俊東吳名賢記高啟傳顧時鴻甫里志合纂

織履者吳人姓名不傳以織履為業初與姚廣孝結方外之交情誼素厚既而廣孝輔佐靖難官進少師晝錦吳中屢訪織履之家織

屨者多方辭避不與接見廣孝乃微服夜候其門乘啟而入織屨

者方草索繫腰坐凳織屨廣孝曰子何拒我之深也織屨者坐凳

不起以鄉音應之曰和尚差哉餘無一語織屨如故廣孝怏怏而

退稗史彙編。明史廣孝以出賑至長洲徒步往訪故人王賓賓

為作賑災記以鋪陳其功光庵高尚當不出此不然是反出織

屨者下也周察字養齋甫里人父病癱十五年扶持起居甘旨盡歡兄字喪偶

遺三女皆為遣嫁兄弟怡怡白首如初顧時鴻甫里志

馬昺字文遠甫里人早孤事其母甚謹初好內典有賣錫者勸令讀

儒書遂通詩易史傳宣德初胡槩槩本巡撫蘇州昺為鄉老胡對

衆有謔語昺諫以為非在上者所宜胡乃謝之昺極陳民間疾苦

胡用其言民感其惠繪像以祀邑民虞宗變以豪富簿錄私許昺

千金卻之竟籍宗變家胡養鶴市兒不知擊死之逮及其父母昺

以市兒為家童攜之入見胡乃以死鶴與市兒時時從胡遊而好

讀書築精舍於眠牛涇郡別駕張大猷扁之曰東園甫里至今稱

東園翁云歸有光東園翁傳參甫里志

錢腴字時用八世祖寶文閣學士端問卒官平江因家長洲漕湖之

錢涇父迪有高行嘗得遺金於道訪其主還之此非常熟代腴少

力學不懈平居篤於養親與人交謙約自持雅不信鬼物嘗抵書

友人賀甫論鬼神之事謂小不能踰大陰不能干陽邪不能勝正

其言辨博當理卒年六十八先二日徙臥正寢以家集一編授諸

子戒婦人不得侍側治喪勿用浮屠言已而逝

吳中人物志。府志錢紳傳引杜啟

人物傳僅云腴與紳為同姓昆弟亦有文

李肅蘇州人宣德間知龍泉縣事當攢造閱版籍慨民凋瘵十無五

六遂具疏奏請歸併都督計二百有七減官學田科則民蒙其福

嘉靖四年題祀名宦祠

龍泉縣志

王處常吳縣人官主事與御史陳祚同里宣德初祚以直言觸上怒

與父母妻子下詔獄飲食不繼處常憐其寃與同里士人李彥庸

歛錢饋食約周復俊東吳名賢記陳祚傳。李彥庸姑蘇名賢小紀作李彥庸吳中往哲記作李彥客未知孰是

徐德用西洞庭人與郡城周宗禮善宗禮攜其子尚行貨湖湘間父

子皆客死權厝江邊無有歸其骨者德用往函之歸舟人以死骨

為蛟龍所憎過江湖有覆溺之患德用不惑其說竟歸之而舟亦

無恙

杜瓊紀善錄

皇甫通號一善居士長洲人少孤家垂替以織室營生立信尚實弟

負商資疾令其還後四方服賈者輻輳財日裕有貴豪欲占竹堂

寺僧地通力爭之遂輟嘗施木於貧室有誣稱父母亡者不問其

真偽與之人有負貸而成姻者戒遣人曰母言涉其新婦其內恕

如此子信信生錄錄生冲泮泮濂俱躡科第膺仕皆通之遺澤也

其瓜涇墓文有緩竊金之盜請造幣之辜直藥師之寃辨尺籍之

濫云云續吳中往哲記。府志皇甫錄傳僅云祖通好為德於里未嘗舉其事實

許朝相字國用甫里人捐建學宮至數千金同里蔣鏞字坦軒備荒

出粟于石固辭冠帶之榮甫里志

王廷禮家荻鄉所謂荻扁王氏也錡從父也府志作錡長洲志作琦有隱德存孤嫁故

人女客有賈偽券索負者為償之終不言

魏昌吳縣人其先自蜀徙吳世有聞人昌木訥人也草服屣履貌朴

野無威儀居近市而堂涂甚修潔疏池置石焉埳隆然有幽邈意

故徐有貞祝灝劉珏皆好焉恒與遊昌既率易不知有貴人諸君

子亦樂其簡也數相和為詩二條劉鳳續吳先賢讚

蔡昇字景東號西巖西洞庭人博極羣書工詩賦為人規言矩行以名

教自任屢與鄉飲四方慕其碩德咸造門請謁所著有太湖志西

巖集具區百咏三書並見府志藝文門成化中以子蒙貴封温州府同知幼

子洋集太湖續編能繼父風具區志。子蒙孫羽並見郡邑志。西洞庭又有徐潮字以同能詩工書

以子縉貴贈如其官

蔣能字士傑號竹坡正統中長洲鄉貢府志誤編入洪武成弘間任福建鹽

運使經歷改長蘆俱有政績善楷書古篆長邑治前有所書碑載

佩文齋書畫譜婁關本支錄

盛僕字汝德寅之子也勤學有行誼寅教之曰醫貴有德顯則出入

禁密微亦往來閩閩不可不慎也僕謹受教父卒醫遂大行不以

貧富貳其心教弟孩成進士嘗使家僮輸糧於官多取一籌以歸

僕怒責之置米屋後以飼鳥雀

盛皚亦作愷字用美寅之孫也早歲應舉不偶遂更業醫術精存心仁

厚士大夫皆禮重之成化初召入太醫院將擢用以母老告歸久之自撰墓誌而卒年七十五子乾亦善為方有父風

盛曠字用敬亦寅之孫穎悟絕人盡傳家學來求必應未嘗索賄其治錮疾甚有奇驗曠孝友仗義好施予嘗有遭喪不能舉者竭所有周其急毘陵畫士馬某以貧來謁館之數年馬願以女充側室曠惻然變色拒之年五十五卒

盛倫字文敘寅之從子性明敏少傳寅學又遇異人授堪輿家言亦精其術人以疾求療及延以相地者殆無虛日四人俱見吳江志按盛氏自元末似祖遷居郡城後子孫俱占籍長洲今有家祠在婁門外下塘祀其宗英十人名十賢祠吳江志仍以四人編入吳江而未紀其現在里居非是蓋祖居吳江一都而子孫如泉洑輩俱以祖籍登第此特仍其原貫耳當為改正曰長洲人吳江籍

唐孝子佚其名居東山在王文恪公第宅後相傳孝子居此割股療親人遂以唐股名其村迄今里門猶鐫唐股村三字惜不知何代人姑錄於此俟質諸博識者

顧仁效結廬陽山之下棄去舉子業獨好吟咏兼工繪事坐對陽山拄笏搜句日不厭或起作山水人物悠然自得人無知者王文恪公陽山

草堂記

文林長洲人官永嘉時地產美梨有持獻中官者中官令民納以充貢林曰梨於民何濟使歲為例其何以堪命盡伐去之中官大怒會林舉卓異將擢憲職中官讒之竟授太僕寺丞勞大與甌江逸志。補長洲志

本傳

徐鏞字同宇吳縣人爲諸生時議論必依名節令石首以撫綏著

記。按府志選舉門鏞字元範萬曆二十九年進士官終陝西參政又按題名錄長洲軍籍

鄒典字滿字吳縣人客遊金陵遂家焉貧苦有志節喜讀禹貢攷工

離騷南華諸書善繪事

葉本麟字惟昭自洞庭東山徙崑山之干墩以孝弟忠信爲聖賢門

戶悉力實踐伯仲同居五十年庭幃之間式好無閒與人交然諾

不欺遇善事慷慨出資無吝色年五十餘卽屏世故閉戶清修

志稿

朱炳吳縣人成化間知延安府洛川縣有文學惠政民有去思

志通

貝明蘇州人監生成化二年任豐城知縣和易近民

劉纓爲御史出按閩訊獄所平反者甚衆民有刲股於母所嫁者父

有司上其孝纓謂出母恩已殺而況爲所嫁者傷遺體得不罪幸

矣關市私洩其利於外國纓以爲傷國體禁楚之尉有陰養士蓄

他計者掩以從戮得無變其發奸如此

周奎字漢章長洲人南老之曾孫也素通武經諸書隨父綱任廣東

融縣久諳民吏之情父卒扶柩歸葬成化間嶺南苗寇變韓雍帥

師勦之素知奎能辟居幕下凡軍務與有濟焉雍征大藤峽用奎

計破九層樓諸壁先後斬獲四萬餘人賊遂蕩平監軍總戎嘉其

功錫猛勝銀牌旌之雍亦以詩贈有獻我平蠻策多君衛國心之

句遂擢丞融邑未幾進攝知縣兼攝羅城懷遠有哨守之功參議

李公嘗刻石記其事以至慶遠冲乾之俘獲桂林瓢里之械報復

得進階一級陞茶陵判官卒姑蘇名賢小紀吳中往哲記補遺合纂。府志引姑蘇志南老傳祇敘奎

履歷未及戰功

姚丞字存道長洲人弘治九年貢生文毅公希孟高祖吳尙書一鵬婦翁也友于楊君謙王濟之與沈啟南酬和九數詩有潮聲驚野客曙色動孤舟霜葉如花好溪雲似水流等句饒有風致。明詩綜府志

藝文門有集虛齋稿

王銓字秉之文恪公整之弟質魯學遲而志甚篤正德間以貢授杭州府經歷時值逆瑾亂政歎曰此豈求仕時耶遂不赴隱居水東

之塘橋疑卽今之孔家塘橋在大村東北作且適園文恪公京邸之園名小適歸山之園名真適文恪

贈以詩有輸與伊人一著高之句因顏其堂曰遂高所著有夢草集四卷皆與兄唱和作也兄銘字警之少隨父任光化年未艾歸

臥湖山絕跡城市弟文恪位至內閣而銘安分如故從兄鑿字滌之能文章不樂仕進隱於壑舟遂自號焉家譜翁澍具區志吳莊足徵集合纂。夢草集

見府志壑舟園紀畧見吳縣志

彭時字中之號南窗長洲人父淳以貴雄里中性慷慨有貧交負其金焚券不復問時性恬雅築重樓讀書其上爲盜所掠累千金置

不問盜敗亦不往求證曰吾可與盜爭是非耶工書好爲詩著見聞錄弟昉子天秩並見志二林居集。蘇州彭氏之先故楊氏明初有彭學一者江西清江縣人也元末

練士兵以衛鄉里已而歸於明改隸蘇州衛學一沒無子官取其姊子楊仲英充籍遂以楊氏承彭氏家蘇州焉南窗先生乃仲英之曾孫也

盧珪字廷玉家采葑溪少孤鞠於伯父以長父母在日嘗有意於義

舉而不及為珪仰體親心輕財好施歲饑出粟助有司賑濟授承

事郎弘治初癸葑門石塘六七里建梅里普濟橋及金涇盧家橋

往來者稱便吳文定公寬記其事稱之為義士云

互見津梁門

毛理官南京給事中以御史彭程言事論成母老無他子奏曰祈少

矜憐全其母子不許

明史彭程傳補吳志本傳

嵇山字靜夫長洲縣學生才高氣邁勤學安貧不以得失介意作文

不拘繩墨文徵明謂吳下雄才非儕輩所及

陸鼎字廷器少穎俊通經史有詩名為杜啟沈周所器重

二條約顧時鴻甫里

志

蔣恩號鐵松長洲人父昂景泰五年進士

昂見志選舉

山東樂陵令恩承

庭教讀書綴文銳志不偶由南都國子生謁選得蒲州同知到任

卽檢尸至深山中察明頸後小傷蓋以驢籠頭自經非毆傷致命

也案得平反調陝州年至九十有四終

吳中往哲記補遺

陳霽為史官時面責劉瑾謂古者刑不上大夫大廷非行杖之所且

言劉健謝遷皆顧命大臣君無故一旦去之恐非所以保富貴之

道瑾對以廷杖正統年有之霽曰此姦邪王振所為爾瑾曰王振

死土木之難忠臣非姦邪霽作色曰此賊幾覆社稷何忠之有瑾

日編修借振罵我耶銜之欲置之死地以丁母憂僅免其後又劾

江彬幾為彬所陷靜志居詩話。按明史不為霽立傳而吳志本傳僅云逆瑾恣橫霽以正議折之未言所折何

事其効江彬亦未及

徐霖字子仁吳縣人徙南京補諸生坐事削籍詩才篆法丹青樂府

俱稱能品文徵明贈詩云樂府新傳桃葉句彩毫徧寫薛濤箋武

宗南巡幸其第欲官之固辭有麗藻堂明詩綜。詩彙見府藝文志

范信本龔泰家僕泰家貧鬻信及妻于長洲下雉瀆某家數年不通

音問正德初泰益貧無所依一日適經其所遇信於途信泣拜延

至家謂新主曰此信故主今流落在此信心不忍敢望容畱信夫

婦願不惜早暮備力報主以圖供養故主新主義之聽允其志而

信俟農事稍閒即肩負小販往來村落中市賣以給終身不衰沈周

客座新聞。昔漢之李善唐之武公幹皆以義僕而名垂史冊今郡邑志獨不為信立傳者殆賤其人而畧之耶殊失善善從長之

義矣又王光菴之僕曰袁端事光菴久亦精于外科光菴歿端德之不忘刻木為像以事焉亦義僕也見譚纂又沈石田之家童曰

朱太平善山水亦見譚纂此皆可入銀鹿春秋

沈醉字茶卿隱居許墅其詩攻研澄潔有出塵之格嘗寄余山中雜

興詩如云鶴病晚山碧僧來落葉黃如云隔花水亂響中酒人高

眠如云花好不出戶雨來還舉觴如云酒醒芳草遠病起落花多

惜乎天不假年人無知者顧元慶夷白齋詩話

金淵字德潤甫里人有卓識善楷書遊京師有中貴欲羅致門下乃

潛歸甫里志

韓永椿字大卿侍郎世能之祖世居長洲之陸墓鎮家甚貧喜放生每早起持帚掃兩岸螺螄于水中有時忍飢掃踰數里如此者四十年不倦隆慶元年世能赴鄉試夢神告曰汝祖父放生功大當令汝入翰林官一品後仕至少宗伯奉使朝鮮賜一品服果報聞見錄

明初自鳳陽徙居郡城外陸墓鎮雲和里是為雲東韓氏永椿之長孫曰世賢號蘇臺始居其門是為貞文先生馨之曾祖文懿公


茨之高祖次孫即世能號敬堂

徐勳長洲人少受母吳教以祖都憲源蔭宰延平之永安廉勤敏慎上官不令其暖席公差各縣辦事以疾卒於官吳中往哲記補遺

徐履祥字子旋長洲人嘉靖二十一年知諸暨縣事明敏有為加意作人葺紫陽書院敦禮師傅谿谷山澤之民無有不知向學者又

重建廟學於學前環西築一隄人呼徐公隄隆慶諸暨縣志。按徐履祥見志選舉表

陳仲周者蘇州告衣巾生員也居城外年既老嘉靖三十二年春倭寇至其家三十三年春有頭目并未冠者二人又漳州島中共七人來履其尸不揖惟拱手頭目問曰多少兵在仲周曰有狼兵有山東兵有民兵彼曰民兵可我一人殺三百又問城可攻乎仲周曰難攻太祖高皇帝百萬精兵圍城七月若非李司徒賣國城何可陷彼曰我怎攻不得耶仲周曰將軍自量彼聽言意以既無神武之威又乏將士之協即以二十四張雲梯折散息登陴之志又問城外有寶乎仲周曰前年將軍取去矣彼即別去而金甌幸無損皆仲周之功也吳中往哲記補遺



蘇峨山蘇州人爲人有膽畧好口才少年負官逋遁去客于嘉興項公子家公子故與胡總制宗憲善爲薦于胡胡方欲說降徐海知蘇之口辨膽畧足辦此也旋使蘇與某某親至賊巢申約賊遂歸降胡所賜賚及賊賂贈與敘功賞賜凡得二三萬金後歸老聞門外洞涇橋每爲人述往事甚詳

沈瓚近事叢殘。明史胡宗憲謀間徐海黨與遣辨士說海辨士殆

卽蘇也

張二莫知所自出善伏水中能月餘不食又躡捷善走死地嘉靖甲寅

寅三年

倭變應募松江方太守

朱良知平倭志張二吳縣橫塘人流寓松江

令調賊數

挾利器泅水遇賊舟鑿其底沉之又時入賊巢偵其情斬首以獻太守犒之銀牌不受犒之以酒則受賊平論功應襲百戶郡縣加

以章服卻之竟莫解其誰何人也

倭變錄。按鄭若曾籌海編是年崑山知縣祝乾壽募死士浮

水八晝夜達郡城疑卽其人

顧堅吳縣人嘉靖中任洛陽令政務寬平先是本縣徵糧沿鄉登門

無論已收未收按期責令起解堅到任曰此非制也每里卽令設

櫃徵解民用不擾

洛陽縣志

吳橋字子東世居洞庭東山之白沙嘉靖間以能詩名姑蘇皇甫汈

婁東王世貞世懋咸推重之世懋齋壁繪山水邀客題咏橋適至

頃刻成七古一首其詩曰老夫家山爲山人來見此山誇逼真朝

煙暮靄儼相似又覺流水聲潏潏松間立鶴勢欲聳石上浮雲光

欲動拄杖行人若去來蒼苔不破空迎送青林茅屋門常開緋桃

碧柳參差栽何人妙手奪天巧令君屋裡藏蓬萊諸客嘆為絕唱
皆閣筆弟相字子輔邑諸生究心理學排斥二氏慨世之居喪者
信浮屠而不循古禮著喪葬祭雜儀三卷以救其失與兄橋分擅

詩禮之長

太湖
備考

張尙友字益之吳縣人精春秋之學吳中治春秋者皆宗之事父純

孝父病革刲左臂肉和糜以進人有欲上其事者怒曰是欲我取

名乎狀苟上我必死之

通志。按尙友基子基本
吳江人避倭奉母居郡城

劉棻字雲巖長洲人祭酒鉉孫清慎不苟少起布衣為中翰後掌誥

敕二十年官至禮部侍郎平日有不言溫樹之謹歷事三朝歸鄉

杜門不出其子序班高被太守王儀編為糴穀右戶始入府言之

吳中往哲
記補遺

棻與太常卿壽光劉鈞並淹貫故實時稱二劉

明史劉
珣傳

王胤昌長洲人官濬縣丞操守甚嚴氣節無損為佐政中之矯矯者

濬縣
志

王鼎居長洲之草橋業杼軸平心信實值儉歲以臧獲不足供驅使

覓之有一少年婦人男子問之則兄妹也以兄嫁妹欲得銀七兩

言決立昏書鼎以饗醞享之二人者泣別雷連食不下咽鼎疑而

審之則夫與妻也慨然擲銀與之爇其文書遣去遂叩首謝德而

走

吳中往
哲記

郭仁字子靜號劍泉長洲人嘉靖二十六年進士官御史時俺答犯

京師兵部尙書孫應奎以兵餉不給建議加派蘇州一府增銀八

萬五千仁詣應奎請減不從仁遂劾奏其罪應奎疏辨帝以仁不

當私屬調之外明史孫應奎傳

科第錄合纂

申士虔字維誠文定公時行族伯性至孝母病割股和藥以進隆慶

三年卒袁安節公洪愈為狀文定公誌墓申氏家譜

楊伊志吳縣人父昇既卒母遺腹生伊志累官御史初為刑部郎視

獄閩中多所全及為汀贛巡撫煦煦稱慈仁嘗言仕無失長者家

兒意為難續吳先賢讚。伊志附見府縣志父昇傳此皆失載者

胡之驥字伯良蘇州人高祖西林曾祖半山祖孝先叔祖武先父大

形皆以能詩名萬歷初之驥與故懷寧守朱期至善因家焉嘗客

燕趙南浮江淮北出雲中上谷與諸鉅公遊而瀟湘雲夢猶同堂

也期至卒為序遺稿行世生死交誼每懷濬冲河山之感縣志

文奎字徵靜徵明後以字行別字靜伯有田在陽城沙湖之間因號

雙湖居士長洲人讀書善筆札聰明強解達于事理平生氣義自

勝不為貴勢詘折文徵明甫田集。徵靜既為徵明兄何以郡邑志俱未之及疑其人不足取俟考

文徵明生平不喜聞人過有言及者必以他端易之使不得言朱明雜筆

補長洲志本傳

伍袁萃歷官廣東海北道副使故參議龍宗武先為太平府同知希

張居正指致宣城諸生吳仕期於死論戍廉州甫兩月逃歸袁萃

移牒江西攝之極醜詆宗武發狂自殺其子人咸快之明史徐貞明傳。補

府志本傳

莫叔明字公遠一名更生自號冷泉子長洲人徙居武林性高邁年

十七卽好爲詩苦思險詣務出人所不經道貧困益甚游燕齊及

楚反葬於武林之湖墅王世貞爲之表曰明詩人莫公遠之墓

通志參錢塘縣志○府 藝文志有永次篇二卷

姚珏字佩卿施中字正甫皆東山人皆能詩皆年登百歲葛震甫客

雪吟有寄懷山中百歲翁姚佩卿施正甫詩

蔣士元長洲人隆慶中以舉人授沅州學正富於學集諸生課之文

藝經其手定甲乙不爽從遊者翕然稱焉後陞府同知

顧碧川富巷人性純孝與弟鳳川甚友愛鳳川往應天不返碧川臨

歿屬其子營左右兩穴以待弟之歸葬也至今虛一穴焉

文肇祉字基聖

肇祉少爲太學生選授上林苑錄事嘗築海湧山莊于便山橋南

鑿地及泉池成而塔影見因更名塔影園畱心虎邱故實萬歷中

寺僧正華請撰山志乃博攷載籍成圖志一卷續集五卷世稱雁

門本是也著錄事集王穉登序之

張世寶字星元蘇州人隨其父近山流寓苕上生有夙慧三歲以痘

失明獨潛心於易上自京房下至康節皆購得其書令人讀而臥

聽之盡得其髓乃垂簾市中求卜者鐵限爲穿凡遇子占父則引

吳月甫定 卷五 人物補

志

之孝弟占兄則引之悌妻之妬者教之娶妾則免災子弟之遊蕩者勸之讀書則無咎其感動人類如此湖俗尙鬼卜者不問醫而問鬼世寶不言鬼而言醫萬厯中當事者奇其術賜額給冠帶湖

府舊志

朱貞字宏信號少崖長洲人中丞紘子少博學能文兼好詩畫隨

父宦遊四方遍閱名山大川見卽有紀紀卽有圖靡不窮其勝槩

旣而數奇遂棄舉子業專攻繪事師舅氏謝樛仙名時盡其筆法

有天然之趣然不欲以伎顯平居杜門養高父執多名公鉅卿曾

不一干謁性方正直爲鄉邑推重無聲詩史。以上二人宜入藝術重其品附諸人物

徐太僕佚其名銜按徐念賜先生如珂傳官終工部侍郎曾爲太僕少卿疑卽其人吳暉西齋集有題

徐太僕畫像詩自注世傳吳中先賢畫像一卷案詩中五六云獨

先元禮彈常侍共幸林宗免黨人是劾魏璫而未被禍者銜按本傳僅云

任光祿節冗費不爲璫屈未嘗抗疏彈擊今云獨先元禮彈常侍

或史官偶遺之歟又按魏忠賢東林黨人榜念賜先生亦在其列

今云共幸林宗免黨人始作詩惜其名不傳吳中先賢畫像係張

蟾筆在陳文莊公家火焚後僅存其半銜又按徐泰時字大來長洲人官太僕寺少卿西齋

所咏殆卽其人非謂念賜先生也許察字子明號鑑湖光福人少通經史倜儻有志畧才幹敏練交遊

皆賢豪長者時稱陽山五傑與大司馬申用懋僉事王問副使朱

邦植尤莫逆知縣宋儀望創義田甦縣中繇役困其經畫盡出于

察人咸德之天啟時東事日棘臺符並海州縣修城壕察與其役

經年不懈巡撫周起元深嘉之書其閭曰服勤王事復削薦廣舉
方正尋以時不可為益韜晦修養生術崇禎七年卒年九十五所

著南峯雜咏一卷載郡志沈欽韓傳

金宗悅宗愉東洞庭人兄弟友愛財不私蓄兩家兒女更衣并食年
逾六十恐子孫或起爭端因析其產凡田廬什器各以義讓至久

不決遂同爨如故具區志

顧嘉會字觀鶴甫里人弱冠父病割股以進父尋愈事在萬厯間陳惟

中甫里志

陸炳字文虎東洞庭人父樞崇禎六年副榜遊於粵永明王用為監
察御史炳未知父存亡日夜號泣冒鋒鏑開關赴粵樞已棄官入

閩炳反求而得之遂迎歸人稱為陸孝子採吳時明祭文

謝夢連字孟草長洲人詩以自然為宗不失唐人風韻遺詩見府藝文志

周之璵字玉鳧長洲人府志選舉崇禎七年進士除刑部主事歷禮

部員外郎其讀史感懷詩六十首援古驗今不失國風小雅之旨

二條並明詩綜。讀史詩見府志

顧超字子超吳縣包山人時吳俗談詩者競以空疎蕭寂相尚超獨

能出入經籍卓然羣雅之遺其長歌兼做溫李而神明之尤為韓

洽所心折採入明詩存選包山詩人前有蔡孔目羽後有葛理問

一龍繼一龍而起者有超一龍從弟彌光字實甫亦能詩明詩綜足徵集

合纂。按明詩綜吳下詩人洪永間有吳縣吳倫字文伯徐章字德彰正統間有長洲王昇字廷禮號玉澗生馬鬻字公素萬厯

間有長洲姚和鼎字長公凌進士漢翀字峻卿吳縣章美字拙生崇禎末有吳縣楊焯字俊三陸來字陶孺又按明詩別裁集永樂中有吳縣十同字孟符此皆行事無傳者姑存其名于此

計佩字潤泉居調豐巷上壽堂即其所居也精岐黃術疎財不責報嘗活山西

王賈于死歲飢食官粥者多患疫翁白當事設局療治全活無算

鄰有鬻女者代為贖歸晚年學道嵩山壽至百歲子孔昭亦以醫

名奉翁極孝翁卒幾至滅性汪鈍翁琬稱之為慕雲山人孫牧臣

有祖父風采風類記

劉古江吳縣庠生布政使玉受之子避兵至崑依外父葛太常錫璠

以居七月十六日古江以全帛自繫及其妻與兒女腕投通惠河

以死殉難錄

陳宗道字夷甫授徒洞庭山崇禎甲申聞北都變涉淮以策干當事

不用遂歸時漕撫路振飛流寓洞庭宗道讓之曰今日非公等偷

閒時也乙酉夏殉難吳江志作吳江人流寓洞庭

鳳翕如字鄰凡西洞庭石公山人貢生崇禎末以漢陽府通判攝漢

陽縣事有惠政獻賊來攻太守溫某城守梁某皆棄印走翕如獨

秉四印以忠義勵民相與死守賊不能克舍去士民有溫梁畱不

住單鳳守孤城之語勒石以著其績尋陞衡州府知府卒於任堵雲

脩傳

吳中有蔣老童者當流寇亂時一守備延之家塾守備剿賊老童慷

慨從軍守備為賊所殺老童大怒揮劍奮身前往亦斃于賊聞于

朝守備贈官老童亦得卹典以其老而不獲青其衿也故曰老童

一子在抱廕以生員按家譜有諱珍字叔葑殉難贈參軍者其卽

此歟惜族人無有能道之者蔣某家世舊聞。按蔣氏諱珍若功子隨叔若來為先鋒官至游擊後歸

吳門遇敵陣亡似非老童

季嵩蘇人隱居陽山不妄交遊有詩云一室焚香几獨凭蕭然興味

似山僧不緣懶出忘巾櫛免得時人有愛憎續太平廣記

周鏡吳人奎長子烈后弟官都督崇禎末殉難夫婦同縊約按

奎長子都督鑑被闖賊追銀掠死鏡疑卽鑑俟考

盛王贊任蘭谿令崇禎中御史喬可聘按浙江至縣遇山水暴漲舟

不得進索挽舟者王贊呼曰農忙矣令請以身挽喬遂改而陸行

仍薦之於朝時兩賢之池北偶談。補吳縣志本傳

張澤字草臣。劉錫名字虛受明末詩人竟陵派吳門四家為徐波劉錫名張澤葉襄而元歎為巨擘見

采風類記。按徐波葉襄並見巨擘又按張澤明詩綜作吳江人俟考

朱鳳翔字古庭洞庭山人與江陰李應昇父鵬翀為莫逆交應昇以

其盛德奉為父執天啓中應昇被逮鳳翔破產持千金尾舟北上

為之百計斡旋時瑞猷正熾禍幾不測及應昇死家中落復買江

陰田二頃助之其好義如此陳鼎東林列傳李應昇傳後

陳靖建蘇州人明末遭寇難殉節至本朝乾隆四十一年恩賜

崇祀府學鄉賢祠

蔣傳長洲人若來之子若來以都督守安慶長洲志作金華崇禎甲申殉難

事詳明史傳及其弟祖奉母王夫人庶母七人暨姊妹二人未婚

及郡邑志嫂趙氏一門十三口闔戶自焚至國朝乾隆四十一年父子俱

賜祀忠義祠若來子王夫人等俱賜祀節孝祠婁關本支

人趙氏等互見列女補

馬萬字士延甫里人性不諧俗貧而介詩古文詞並臻妙品有旃檀

閣集集見府志西山拾翠虎阜芳踪填詞行世甫里志移家槎上南翔

三槎逢歲稔邑令余敏憐其貧餽以粟謝弗受卒窮餓死侯開國

稱其詩持擇精嚴匠心入妙清醒俊逸中獨能自拔於流俗寄問齋雜

誌

曹遜曹肅曹敬俱長洲人崇禎甲申殉難至本朝乾隆四十一年

恩賜入府學鄉賢祠又有虎邱儒士亦以甲申殉節崇祀鄉賢

惜其名佚

吳縣舊志人物傳有東山朱良佑周誠武山吳文之西山陸文組四人俱前明人文行卓然足以風世而新志削之不無遺憾故特附誌於此。朱良佑字太和開酷坊於金陵慷慨好義揮金結納南都御史海忠介公瑞過其酷坊諮以時事具以所見對公卒哭之以詩中有云批鱗直奪比干志苦節還同孤竹清詩載明史公身後釀金扶輿歸葬瓊山皆賴其力。周誠四歲喪父及長為人傭作日必歸視其母一二度或勸其行賈較逸而所得豐誠曰得朝夕侍母雖勞勝逸弃母遠遊雖利弗為也每得肉必持歸奉母母年九十卒每日必謁母墓而後赴備陸幼齡為立傳。吳文之字與成敏曾孫才性絕人讀書目數行下七歲能屬文未弱冠發解應天登正德辛巳進士選庶吉士有聲翰林年二十九卒於京邸人咸惜之。陸文組字纂甫醇朴敦厚和氣襲人始為賈忽觀黃河奔流恍若有悟遂弃去就學與松陵正叔承同時以詩鳴其詩淡遠有王孟風格當時謂陸治畫中有詩文組詩中有畫目為洞庭二陸所著有北山篇鴻里什江上草等集

國朝

翁彥博字約之東洞庭山人曾祖參有義聲見郡邑志彥博有才幹

當鼎革時山中奸徒作亂焚劫鄉里彥博倡率好義者殲其渠

魁一山始獲晏然塾師高某謀徒過嚴致殞一子彥博毫弗介意

復延高三年人服其長厚云

林屋民風

程豪字子德蘇州人習儒術商于黃岡歲儉糜粟以食飢人邑令旌

之兄表字子儀亦有文行督學

鄭茂訥字敏生東洞庭山人有至性庭桂一本為亡母手植室被災

桂亦燼茂訥痛手澤之湮弗忍鋤去越數旬燼桂復萌漸葱蒨如

舊人以為孝感所致

太湖備考

鄒儒字汝為武山人以烏程籍中順治十一年浙江鄉試選嚴州府

遂安縣教諭康熙十三年耿精忠反於閩賊黨馬鵬汪壽等旁掠

郡邑入浙省陷遂安儒被執不屈授以偽劄不應乃幽之別室儒

俟賊夜醉逸出攜其子宏志踰城至同年章潤奇家糾集鄉勇從

章雙桂攻城雙桂先登斬其魁賊奔逸城乃復翌日賊復掩至環

攻十七日鎮臣鮑虎救兵至乃解復城守城儒皆與有功焉

足徵集

蔡旅平字文若西洞庭人蕭散簡遠有遺世獨立之概終身不事生

產日與其友乘扁舟嘯傲山水間屬善繪事者圖其迹又自作洞

庭紀勝一集屬工書者書之文章不尙纖縟記序有柳子厚風格

詩在溫李之間晚年築天際樓春草堂以自娛因又號天際主人

孫正渠字丕式府庠選貢工制藝有詩文稿若干卷

林屋民風

金懋顯吳縣人五歲母沒每念及輒淚下明末避土寇山間遇險峻必負繼母不辭勞父喪聞訃徒步奔歸聞者咸歎息性好施親黨待以舉火者不下數百家

通志

沈湄字伊在居金閫石田孫頎而秀精警有機辨一時傾其座人畫

學趙承旨布景設色超詣獨絕詩亦沈鍊有法度

節吳梅村文集按眉公筆記

石田之子雲鵬先石田卒湄疑為雲鵬之子

顧啟賢吳縣人父病割臂肉愈之姊家產蕩盡迎養終身又為嫁其

二女從姪幼孤不能自存啟賢撫育之及長為授室且予之貲本

以逐什一

通志

陸采侯居吳門忼爽有氣節順治間某商主其家為置貨畢束裝將

行采侯止之曰詰朝重陽佳節客不囊萸山上而反載月船頭耶

商乃移貨他寓為便行計明日攜斗酒登治平寺盡醉歸他寓忽

失火數百金物盡為灰燼采侯驚嘆語商云若貨未登舟猶吾貨

也且我不強若畱火安能及竟竭蹶償其值商且喜且感而別采

侯與其弟俊侯同居隣家失火左右蕩然獨陸氏廬無恙未幾再

火兩隣又蕩然陸氏仍無恙時鄰墻傾采侯兄弟正覆其下觀者

痛兩人應為齋粉亟鋤出之見傾石若一街然采侯兄弟戰栗危

坐無纖毫傷遠近傳為好善之報云

信徵錄

馮一桂字秋卿甫里人母病危晨夕虔禱北辰求以身代一夕母夢

神授以藥服之而愈鼎革時一桂奉父母倉皇避難遇戚舟求共濟拒不納未幾戚舟被兵而一桂反全家無恙蓋孝感也父母沒哀毀幾至滅性隱居教授以終其身同里陳夢升字鳳竹父嘗遇盜將加刃夢升延頸以待盜義而釋之

甫里志

彭德先字敬輿明吳縣進士汝諧之長子也生萬曆中倜儻有奇氣以諸生貢太學時天下方有事遂究討兵師算數之略及水利邊防星占諸家言習弓矢慨然有四方之志福王立阮大鍼當國爲汝諧同年進士或勸德先往干之笑而不答巡撫祁忠敏公彪佳開禮賢館德先乃上書陳兵食事宜並請蠲苛稅彪佳得書驚異延德先釐正賦役綜故籍斟酌出入爲書書垂成彪佳罷去國

朝定江東故籍盡散失司理沈以曦復請德先因前書爲據順治

二年蠲卹賦額悉委德先裁定晚歲出入震澤之濱晨夕煙靄

嘯歌自得因自號游湖漁叟已而買地玉遮山更號曰玉遮山樵

康熙四年卒年七十有六初周忠介公順昌忤逆璫削籍德先往

受業及被逮憤發欲與同難率二子再謁繫所幾不脫虎口所著

賦役書若干卷子瓏孫定求弟行先行先孫寧求並見志

二林居集

許王儼字孝酌元溥長子長洲諸生以文行稱賑饑民贖難婦建橋

梁創育嬰堂諸善事皆實心實力爲之郡守甯雲鵬重其名聘修

府志

甫里志。著述見府藝文志

徐籀字亦史吳縣人崇禎六年舉人高才博學風流蘊藉康熙初

吳志

選舉表作 由靖江教諭遷知黃岡縣事愛民息訟薄賦省刑見四

順治間 輒泣下欲生之士民皆感激時邑多火災燬民居籍捐二千餘金

分賑又修建學宮補葺古跡文物燦然在官無泛交紳士端方博

雅者倍致禮重邑人謂以文學治者必首推焉著有吾邱五集集

府寓黃小草歿崇祀名宦 黃岡縣志。按明詩綜長洲徐樹丕寄

世官清得晏眠之句 卽秉鐸靖江時也

陳上善字元水蘇州人博學好古以詩名海內兼工篆隸僑居南昌

之東湖去榆塹不數十步與萬時華陳宏緒徐榆溪相友善所著

有山居詩及適餘堂集見施閏章集南昌縣舊志

鍾士華字方宇西洞庭慈里人家貧傭保自給康熙戊子己丑歲薦

飢日一粥不再餐妻勸以子女易米士華怒曰身可死不可辱也

後米價騰貴累日不得食妻欲行乞士華怒曰身可死不可辱也

遂自經死鄉里哀而濟之妻子得無恙林屋民風

葛以位字允宏西洞庭山人家累千金盡所有以濟人終不責償先

是山中人生女多溺死以位倣郡城育嬰堂例捐貲設雷嬰堂於

鎮下里復爲文勸戒人皆感化全活女孩無算林屋民風

朱慎闇自號潤寰父文彬自吳江徙郡城慎闇喜讀史好施與平居

尤有至性母常患末疾輒中夜焚香露禱願以身代無已遂封股

肉治糜以進母疾良愈慎闇不以其故語人久而稍有知者或質

諸慎闇慎闇蹙然曰此不得已耳豈吾本心欲爲是乎由是衆益

太息以為難

汪琬墓誌

陸志熙字子敬

家譜別號字鏡

長洲人吏部郎中康熙初遷崑山南星瀆

府志吳縣貢

尙氣節工詩文承先志不謁選人康熙初遷崑山南星瀆

與歸莊王晨吳父輩結社賦詩少與徐乾學兄弟友善後乾學貴致書招往都門不答以博學鴻詞薦亦不應未幾病卒所著詩文

集若干卷

崑新台誌

沈馨字石均木瀆人康熙中以詩鳴至乾隆初同里有張錫祚黃子

雲盛錦皆長于吟咏沈文懋公稱為靈巖四詩人彙訂其稿刊之

錫祚志有傳子雲錦後有傳馨有宛陵吳門兩集見府志藝文

朱允恭字公懋東洞庭山人富而材康熙初長興劇盜赤腳張三由

太湖掠橫山一帶擄富家子置山寨勒金取贖當事患之時允恭

効力撫轅撫軍詢以湖盜事允恭曰赤腳矯健絕倫然好聲色可

餌也請給假五十日得便宜行事當縛致轅門許之允恭訪得其

黨好語之曰張君誠豪傑吾欲與交權今以千金為壽願保我桑

梓賊黨攜金致詞張大悅約日至山謝允恭乃盛設合樂以饗之

陰遣勇士雜優伶中酒酣卽席擒之馳解撫轅正法餘黨駭散湖

中自此寧謐皆其力也後為山東萊蕪令有政聲累陞福建延平

府知府

太湖備考

王明遠吳縣長沙山人家貧業攻木所得悉供母甘旨母病十餘年不敢出山傭作有某邑大工同業邀之明遠曰母老病奉侍無人

不敢往母死竭力營葬哀感動人兄早亡嫂嫁遺孤甫一歲明遠撫育成人為之娶復析已產之半以予之人以孝弟稱焉

林屋民風

葉樹蓮字石君東洞庭山人僑居常熟博學嗜古藏書至數千卷遇

宋元抄本及名家收藏古帙雖零落必重價購之其所藏書條別

部居精辨真贗手識其所由來識者皆以為當崑山徐司寇乾學

慕其名而未相識為之作傳何義門焯曰書經石君評閱眉目始

出其見重名流如此樹蓮既歿書多為人購去

錢陸燦常熟志。按葉有東山詩紀

見府志藝文

翁澍字季霖東洞庭山人彥博子博學知名家多藏書能詩文喜結

納所交率當世賢士大夫與下堡金侃交最善延至家塾晨夕相

對商榷古今著具區志一編自謂經濟之學有以補蔡王二書之

未逮云

太湖備考。金侃字亦陶附見吳縣志父俊明傳其詩采入別裁集中其區志見府志藝文門

程枚吉字汝諧居虎邱望山橋西祭酒孫岳頌甥書法酷似其舅家

居食貧工詩與姜實節相倡和授徒養母

顧詒祿虎邱志。府藝文志有楮葉集六卷

張冷字浣心居陳湖博學能詩康熙十五年廣德州學博沈曾成集

詞客出花草畫冊拈幅題咏浣心拈得殘荷即席口占云水冷風

淒氣已涼荷衣秋老不聞香采蓮人散譟聲寂明月還來照野塘

一座稱善

堅瓠集

張登第字賡俞長洲人以順天籍中康熙十六年舉人授武進縣教

諭持身端謹遇士以禮既去任士子思之以德風化兩四字揭於

振德堂祀名宦祠

武進志參
登科錄

郁裴字肇名長洲諸生家貧授徒讀書作文外弗問戶外事順治十四年舉于鄉時南闈蚤緣事發詔覆試明年集京師試以詩賦頌解裴不習詩是日詩賦有古意試春官不第歸仍授徒讀書作文無少間康熙十八年成進士年已六十五矣性質直無城府遇人無貴賤輒率意與語無飾辭有所拂亦無愠容澁于口欲言則曰赤赤或戲之曰先生赤赤也裴怡然嘻呼之輒應館選名稍後憤而歸乃館于門生家辛酉春忽病未幾死相傳死後為泰安城

隍神云

曠園
雜誌

顧鳳儔長洲工田村人割股療親巡撫慕公天顏旌以孝德可風之

額

顧時鴻
甫里志

篙師張麻子者居長洲縣治東家貧而鰥偶如廁見一人倉皇出遺一囊啟視乃白金數兩急追之其人已入縣應比較探銀則烏有矣哭訴云今日鬻一女得銀數兩不意失去令叱其妾將加責麻子急擎銀至云某銀固在也令問故具以實對深為嘉歎出俸錢三百文旌之一時傳為義事今麻子年已六十餘理楫矍鑠如故

時為康熙十八年事

信徵
錄

張壘字牖如長洲人諸生就旗學教習師除河南登封知縣耐清苦練世故愷悌積中見義勃發登封自明季遭寇亂民多失業壘至革私斂招流亡督之耕種蒞官甫五月修復嵩陽書院延鄉先生

耿介爲之師導諸生以程朱之學別立學舍二十一所課諸童子以時巡閱導以揖讓進退之禮間策蹶歷民舍恤其癸獨教以禮讓聞者莫不灑然易慮縣西境有呂店者俗好訟難治壘舉善士張文約爲鄉約俗爲一變甲長申爾瑞負稅將受杖路拾遺金二兩佇失金者反之壘詰得實旌其門其後有王進寶魏光大秦瓚者皆拾遺金而反失者焉高鵬舉死妻孟氏年少舅欲強嫁之孟氏哭夫墓將自經壘適遇之給以銀布救其舅養之終身時獄訟日尠衙胥無所得錢稍稍自引去歲饑煮粥以賑復移粟以給老弱仍輸麥數百石俾及時下種焉康熙二十一年自春徂夏不雨壘囚服暴烈日中拜表引罪步登少室冒夜汲泉反嶽廟叩頭

呼籲慘切俄而雨大注在官五年民知向方生聚日盛家設壘位旦夕祝大書官清民樂於門二十二年遷南寧通判去之日民遮

道哭旣去立四祠於四鄉榜曰天下清官第一

懷嵩堂贈言
張孝先誌墓

張翬字羽軍一字采舒家在虎邱工詩善琴而豪於飲性喜交遊重然諾卽利害無所避法寶者旗人也行事不甚循禮上聞之不悅寶懼禍挈家走姑蘇翬與有舊致之窟室而藏焉居久之寶恐事露累翬乃更移無錫之惠山康熙二十三年上南巡爲僕所發且厯指所匿處上震怒置寶極刑翬減等流秦

潘恬如字克先長洲諸生其學切於內省聲光闇然以師道推重鄉里與彭定求尤侗爲友年八十以疾終先一日致書侗曰生吾順

吳日補
沒吾寧到此覺眞實受用也定求聞而歎曰潘先生其知命者乎

南响
文藁

張景崧字岳未吳縣人康熙四十八年進士官樂亭知縣學詩于葉
燮稱入室弟子論詩以新鮮明麗爲主謂與其爲假王孟不如爲
淺温李以王孟可僞爲温李不易僞爲也王阮亭尙書比之韓門

張籍別裁集。景崧父涵字函西康熙四十四年副貢友教吳中生徒極盛

郭進字簡修居虎邱性至孝父母伉儷睽隔誓不相見進涕泣勸慰
父母爲之感動進嘗病死魂至府城隍廟見父母神前拜乞旣而
神謂進曰汝有孝行特延汝壽速遣歸及甦已死二日矣自著回
生錄紀其事時康熙四十九年顧詒祿虎邱志

顧藹吉字畹先後改字天山號南原吳縣貢生府縣選舉志失載山水宗法

元人遊京師爲王原祁稱賞以纂修得官終於儀徵縣學博兼精
籀篆工八分書著隸辨行世張庚畫徵錄隸辨一書以婁機漢隸字源

爲藍本凡婁氏以後續出之碑悉爲採入足以補遺所纂偏傍一
卷頗爲精核碑考一卷亦較婁氏碑目爲詳四庫書目。隸辨見府志藹古志誤作藹

尤秉元字昭嗣長洲人康熙五十三年舉人官樂至知縣年五十餘
响响嚅嚅依然童穉及乎蒞官民安政肅去後猶思詩承西堂滄
湄兩先生後不入輕浮之習別裁集

陳綸字世掌一作世章號西亭西洞庭山人父文炳著四書合參未成綸
續成之好歌詩慕謝康樂風旨嘯傲泉石不求人知郡守陳恪勤

公鵬年造廬訪之稱爲樂天君子

太湖備考參
林屋民風

姚浩字謹行吳縣人文毅公希孟之裔穎敏力學好古博覽法書名畫鑒別最精工詩文力追古作者無纖佻綺靡之習康熙中爲漕州判官地雜苗夷慣用蠱術浩宣布恩威俗以丕變條議開河百里以濟遠近未就乞歸老于崑山之張浦以書法名聞四邑間架嚴整腕力厚勁自謂得黃庭九宮遺法摹古名帖日無虛晷晚益以平原欽股漏痕自負學者咸寶貴之云

崑新
合誌

王世繩字茲來少詹世琛之兄官至吉南頓道虔俗生女則溺之世繩諭以至性其風遂熄又以文教荒陋卽濂溪書院廢址捐廉重構延師課士自是登第者不絕兼理權務有廉聲

顧祖鎮
墓誌

徐梅字若霖號南州居長洲之貞豐里授徒東山愛湖山之勝尤愛葑山荷花曰此藕花深處卽子家也僑寓十年而歸爲人敦友誼重然諾長於古文詞詩宗唐人集唐句如出天然少與張大受何焯吳士玉諸人遊結詩文社後諸人皆顯而梅獨以一衿終士論惜之著有古文六卷詩六冊

太湖
備考

張畹字蓀九長洲人

或作吳
縣人

布衣窮居郊外世緣半絕素交二三人

外車騎造訪之弗接也論詩必泝源唐人以前有與爭辨者至面赤不顧或目爲詩癖爲詩愚乃大喜身後詩篇零落祇存移木芙蓉植後圃一篇

別裁
集

自號石帆言其不適於用也中懷夷曠若有

得者與人和易無町畦略涉經史晚而好易嘗館於支硎山老矣

舉動若孺子一日還家無疾而逝

彭紹升測海集

許名崙字瞻之元和人少好學尤工詩五言其擅場也平生無意功

名每當春秋佳日與二三昆季登高觴咏遇物流連卒年七十有

一甫里志

許名崙字蘊源元和人國學生瀟洒有晉人風天姿穎悟自經史子

集旁及釋典無不淹貫平生制作等身工駢體兼擅詞曲屢試棘

闈不售雍正元年鄂文端公爾泰開藩吳中搜羅博雅能文之士

拔取名崙冠軍文載南邦黎獻集後高官保晉撫吳舉博學鴻詞

報罷與上人心鑑聯吟社時人方之靖節遠公云

許集傳

金愷字漢三吳縣下堡人吳江籍雍正二年舉人自少有文名制藝

靜細而有致詩亦如之為何焯及門中之翹楚

彭啟豐字翰文號芝庭世居葑門南昀先生定求之孫雍正五年會

試殿試皆第一科名與乃祖同授修撰累遷至兵部尚書上

知啟豐廉明能文章命校順天鄉試者一主直省試者七督學

政者三經歷滇南中州江右山左浙東西輶軒所臨庶士懽迓後

以事降侍郎休于家主講紫陽書院年至八十四而卒啟豐以醇

德樸行著於朝野而性耽風雅使節所至遇佳山水必游歷乃去

集中近體詩寫景關情神妙獨到

張一鳴字鳳舉長洲人申雍正十三年順天舉人受知張清恪公伯

行清恪被誣幾蹈不測一鳴躡險尾行士林重之

別裁集

薛雪字生白號一瓢所居曰埽葉山莊爲錢氏南園舊址有花竹林
泉之勝乾隆初舉山林隱逸尋放歸沈文愨公以王光庵比之謂
能詩而以醫自晦與光庵同至工八法解繪事馳騁騎射刀稍閒
又有能光庵之所不能者袁太史枚有庖人將死延雪藥之一劑
而愈因極口推重雪曰我之醫如君之詩純以神行所謂人在屋
中我來天外是也山莊門帖云堪笑世人無狗監何妨自我作牛
醫楹帖云九重天子垂清問一榻先生臥白雲其自命可知矣
子六郎有神童稱早卒

吳日孜字愷若少喪父事母孝母歿號呼擗踊幾絕雍正辛亥值五
十辰先一日逸出之蕭寺中設母氏位深衣練冠如居喪時諸子

勸歸哭曰吾痛無以報母德忍以母難自宴樂耶明年疾作且晝

中恍惚與父母語越一年卒

沈德潛誌墓

劉震字東郊長洲人以布衣傾動王公非獨才分之高由胸襟潔白
不爲名利動也詩英氣逼人如芙蓉出匣晚歲隕然放筆迥如二

手矣

府藝文志有東郊集

金縷字絲五吳縣人官宣城訓導詩負奇氣不肯一語庸下比之利
劍寧寸寸折不爲繞指柔也晚年研究易理不復吟詩蘊亭詩稿
皆少壯時作

謝淞洲字滄湄長洲人布衣畫師元人得四家意趣精於鑒古世

宗出內府所藏命其鑒別一一不爽世宗善之詩學以天

趣爲貴猶畫中之元人也

金義植字立斯號東塘吳縣諸生攻詩與其配偶於楓江之濱晚

歲耳聾不聞世事尤得安分自得之趣王小山名時翔太倉人贈之詩云

五字隨州擅君家許問津自逢彈古調不敢薄今人楓影寒孤榻

鐘聲淨六塵隱居兼德曜唱和共忘貧

陸文銘字書巖吳縣諸生甘於食貧舅氏爲吳尙書士玉無一語干

瀆品可知矣詩亦戛戛獨異適如其人五條並別裁集

葉德大字舜平東洞庭山人家素封無膏粱習氣喜讀書書法學東

坡盡得其妙閒畫蘭有松雪意與同里某友善某爲人許告逮赴

京平時相徵逐者咸畏禍匿跡德大獨送之渡江歸復經紀其家

太湖備考

許徐狝字聖皆光福人長洲諸生少孤力學兩應秋試不中卽棄舉

子業肆力爲詩惠學士士奇及徵君棟亟稱之徐狝清癯鶴立寡

言笑隴頭課耕每執卷吟諷訓後進嚴而有法嘗曰四民宜專其

業毋僅鮮衣美食游惰盛世鄉里敬之奉爲祭酒其詩古律兼善

不拘一格其時沈宗伯德潛以詩名江左力主盛唐非是則爲外

道徐狝出入唐宋諸家故當時不甚推重後之定論以爲洵能自

立者也年八十三卒著有耕閒偶吟三卷沈欽韓傳

黃商衡初名師憲字景淑元和人孝子農之子少孤奉母教課讀甚

嚴稍長益自奮沈思理輿爲文日深造然久困童子試陳恪勤公

鵬年知蘇州試第一院試輒落年四十餘始補諸生不復有進取
意惟日陳先儒語錄討論推衍合為一書題曰困學錄先是母金

氏以節婦 旌 見長洲志 父以孝子 旌 見府志 商衡謀合建孝節坊而

未果其子庸始克竟其志云庸亦端士晚舉鄉試老於家 二林居集

黃濤楫字逢源吳縣諸生文筆工秀書法效歐陽率更居草草亭著

書自娛生平不輕干人李中丞馥延之商榷文字乾隆元年貢太

學尋以陝撫石某薦舉鴻博未赴試卒 談炎衡傳 兄傑字當時府學生

工書畫 任兆麟虎阜志

錢廷熹字孟容吳縣人國子生 舅氏顧花橋先生既以吾母苦節載

生平醇德隱操非同尋常諛墓也謹錄全文以備採擇子妹婿錢君沒三十五年矣鄉黨親族猶思之不置蓋其生平孝友忠信樂

善好施有以感動乎人人也葬有日孤子德基等來請誌納諸壙
予弗忍辭君諱廷熹字孟容考太學生 贈文林郎諱枚祖歲貢
生諱允源妣朱太孺人君五歲失恃群踊哭泣有若成人事考步
不忍離考病晝夜省視每進藥必親嘗考假寐時時穴窗紙含淚
窺之年十七考棄養君以祖年老喪子情不能堪飾為懼容以相
慰藉退而撫膺哀慟棲臥柩側枕席之間血淚斑斑祖以中饋無
人娶子妹主家政妹亦能體夫志孝事其祖不一載祖歿君家本
素封內外覲覲將伺問而起為覆巢之計君學之以誠家難旋解
時繼祖母陳生祖母鄭皆在堂君起居溫清虔共甘旨無有岐視
故嫡庶無間言撫其弟延名師教之而家之艱鉅皆以身任不以
溺弟俾得再意讀書後弟登賢書為令山之艱鉅皆以身任不以
也勗其族人相與勤學於故居之東南隅倡建文昌閣以為肄業
地請前輩能文者評其月日而君供脩膳君歿而閣遂圯雅好賓
客當春秋佳日招邀朋舊置酒堯峯草堂把盃譚論上下今古叩
門緩急傾囊以濟如應水火識者以為鄭莊季布再見也年甫二
十有三得疾歿于思人惟處窮困蹈憂患勞其智於事物乃以不
永其年若君者曠然不有累其心而無所屈其志然其壽考亦以
不長豈其所謂修短得失者固有命耶予見世之顯榮而多壽考
者比比也然生而赫赫歿則已焉君雖用未竟才中道摧折而至
今稱道人口所得孰多其亦可無憾於九京矣君生於康熙庚寅

七月初七日卯時歿於雍正壬子九月二十二日卯時乾隆三十
二年八月二十四日申時葬於吳縣太平鄉七都十一番東伯字
圩朱家村之原娶顧氏為子從祖庚辰進士三典孫女從叔附貢
生福衍女子三人德基端陞皆太學生思元吳縣學生孫六人士
鍾士鈺士鑿士鑄士鈇士錚孫女七人一適張恒齡一
許字國學生沈桐。鍾後改鉉鉉改鋒鑿改銓鈇改錡

徐炯字漢光居元和之陳湖東年十三父疾甚日仰天禱涕泣不欲
生及父沒欲死者數矣母已前沒事繼母色愉愉若孺子繼母嘗
語人曰有子若此孰謂不我出耶兄弟三人炯其季也父在日三
分其產及炯長大日區區者析而三愈不足兩分之其可盡以讓
兄而已脫身為賈兩兄有缺乏復分已私財與之其妻時時脫簪
珥為助及炯疾將終屬其子曰善事伯父通有無毋忘吾志
陳黃中字和叔吳縣諸生乾隆元年薦舉博學鴻詞報罷黃中為少
二林居集

章先生子名景雲見長洲志校讐攷訂是其家傳而黃中少時即留心史

學頗以經濟自負常遊督撫幕府晚年歸家病宋史繁蕪如湯義
仍王損仲屢有刪改皆未成書因將宋史紀傳表共改定一百七
十卷但以未諳天文歷律故各志尚屬闕如詩不多作彭紹升收
而刻之湖海詩傳

沈德潛字確士自號歸愚始居木瀆後徙郡城祖欽圻諸生父鍾彥
累世積德並載長洲志德潛幼赤貧幾廢讀年十七學詩於吳江
葉燮王尚書士禎抵書於燮稱沈生在及門中不止得皮得骨直
已得髓自是詩名滿天下康熙三十三年補長洲學生雍正十二
年舉博學鴻詞被斥至乾隆三年始登鄉榜年已六十有六矣明

年成進士改庶吉士 上諭張廷和云沈德潛係老名士有詩名
命和消夏十咏稱 旨四遷至侍讀學士九年陞少詹事典試
湖北歸遷正詹事 授禮部侍郎入 上書房十三年充會試副
總裁十四年患噎傳 旨許其歸里朕與之以詩始亦以詩終令
其校閱詩稿畢起行歸後 眷益隆 賜詩 命和 命校益密
嘗進詩集求序 上欣然許之小除夕手書以賜比以李杜高王
海外日本琉球諸國走驛券索沈尚書詩集自古詩人未嘗有也
十六年 南巡 旨諭在籍食原品俸尋加尚書銜復加太子太
傅改食正一品俸三十四年卒年九十七諡文愨子二攀松孫七
熙 欽賜舉人德潛詩專主唐音以溫柔爲教如絃匏笙簧皆正

聲也吳中自九侗顧嗣立領袖騷壇一時名士徐昂發蔣夢蘭輩
與並馳騁文風極天下盛德潛稍後出主風雅數十年與之游者
張錫祚周永銓周準盛錦顧詒祿亦皆以能詩名錫祚永銓準志
有傳錦詒祿後有傳

年譜墓誌合纂

錢廷熊字彥仲號荻蕪吳縣浦莊人乾隆三年舉人授高密知縣歲
薦饑親歷窮簷按戶計口給賑不假胥吏手鄰邑流民間風至罄
私橐蓋草房數十區令男女分居日給兩粥至春和給口糧遣歸
巨盜王繼才邱二和尚積爲民患夜潛率兵役突擒之居密三載
捕蝗力祈雨虔催科寓撫字意治聲大著調荷澤又調朝城浚伊
家河捐俸卹夫歲事速監司稱賞調長清裁陋規薄供帳禁民馬

之應差革收漕之斛而民便之尋告歸三十二年濬采蓮涇凡五百餘丈三十五年卒年五十五廷熊事母孝喜吟詩有餐霞閣稿
沈文懋公序子元培孫人鏡三錫士鎮人鏡子濟光兼祧士鎮後
倪承茂字稼咸吳縣人乾隆三年舉人素長於詞而詩亦工穩妥帖
兼工制義穿穴六籍不為風氣轉移尤能啟迪後進凡吳士之有
名者不問而知為門弟子也有頤塘詩稿

邵岷字百峰元和人諸生舉博學鴻詞被斥少歲作詩汨於異說總以險怪

為主後為劉震女夫日漸月摩一歸於正至三十餘居然作手矣

其七言律詩最工惜遺稿散軼

尤怡字在京或作涇一字飲鶴長洲人布衣昔皮襲美寓臨頓里陸魯望自

甫里至與之定交倡和其地為皮市怡適居其間周永銓亦至自
甫里相與賦詩恰符皮陸也怡就韓伯休術欲晦姓名詩亦不求
人知而重其詩者謂得唐詩三昧

吳廷璋改名號半園字友篁吳縣武山人上舍生不官從孫有七十二

峰足徵集表章具區文獻吾黨有心之士也詩不分唐宋以新穎

為歸時有名論與翁志琦字琢山稱東西二家銜按不官名時德字明之見府志又按半

園分修府志徧歷太湖圖繪湖山四人見別裁集

王嗣芳字廷紹唯亭人父旂彥長洲諸生嗣芳嘗遠賈逼歲除冰阻
徒步冒風雪歸以慰倚閭望父病劇籲天請代母病目舌砥而愈
居親喪哭盡哀進食必侍凡依影堂者三年尋以營葬積勞成疾

卒妻顧氏號慟欲殉族黨曲喻而止乾隆二十六年督學使者劉

文清公墉給額曰白華翠竹蓋旌子孝婦節云甫里志

錢桓字士西吳縣人詩律極細沈文愨公亟稱之有陶村稿附錄家傳余於

吟詩之暇手輯家譜因歷數族之能詩者後先相望代不乏人而實自從祖陶村始陶村諱桓字士西居橫金性冲和而癖於詩與余先後受業于沈尚書歸愚先生著有陶村稿二卷集中詩皆先生所手評李客山為之序先生稱其詩律極細客山稱其善學温李皆確論也陶村從弟仇詒名景陶字蔭南自浦莊遷郡城工短翰為蔣方棧記室無子詩稿散佚僅存學圃日記中近體數十首亦清婉有致陶村子蕊洲名廷揆字藻儒乾隆己亥副貢髫齡時嘗侍父聯句云香生玉塵花當檻影度書幃月掛村後刻苦力學兼精駢體晚年詩尤得石湖幽致云其後繼起者又有二人一為兄子曰堅一為族孫奉津曰堅名士鋒號小文縣學生性嗜酒酒落詩亦如之有半綠莊小草奉津名為梁號雪葵亦嗜酒天資敏悟博覽羣書詩古樸不流甜俗二人皆後起之秀而為陶村仇詒蕊洲之嗣音也今奉津亡矣曰堅亦善病不復作詩此後更誰為嗣音者抑余又有志焉前明文氏雁門家乘彙輯族英遺稿附於

其末以垂不朽余於五人詩亦將合而刊之以附于宗譜使後之考世繫誦遺編者足以想見諸人之性情一家之風雅且以待采風君子之選擇也見止庵存稿

姜森玉字孚尹東洞庭人貢生性孝友品行端慤素耽禪悅與諸山

老衲問答恒有省年逾九十視聽不衰作為詩文落筆如飛少年

望而斂手乾隆戊辰舉鄉飲賓卒年九十五臨終子孫問有何言

口占一詩曰百年聚首了前緣脫網全歸覺洒然問我臨行有何

語片雲捲盡是青天吟畢而逝太湖備考

呂種玉字煙農居閭門父垣夢人授以白璧曰爾其善種之故名種

玉種玉生而明慧五歲就外傳受四子書過目不忘七歲知朱陸

異同既長善為詩送大兄之楚云江穩孤帆直天空獨鳥寒喜心

傳至云虛窗寫菊秋同淡高閣雄談劍有聲朱竹垞先生曰涪翁一派近在金閫矣著有言鱗

盛錦字庭堅吳縣人諸生有青樓詩鈔詩從大厯下入手後層累而

上風格漸高至入蜀詩得江山之助沈雄頓挫直欲上摩王漁洋

之壘以仰窺少陵蓋漁洋詩以蜀道集為最勝也別裁集。盛氏世居木瀆錦從

弟璋亦能詩

沈執中字立方明山東巡撫林見志之後長洲學生有病循覽內經至

恬淡虛無灑然有省自謂真樂見前纏縛自脫因題其室曰心太

平居作太平吟四首以恬淡虛無分屬焉已而閱王門傳習錄手

抄成卷寶為心印所居古屋數間泛埽則已或請陳設玩具執中

曰一門之內父父子子兄兄弟弟夫夫婦婦吾之陳設不既多乎

同里陳子瞻有一子督責過緊逃諸外一日子瞻詣執中讀恬淡

虛無詩恍然自失執中為推言萬物一體之意子瞻感激涕流由

是父子間宿嫌頓釋矣執中性愷悌族姻故舊最所敦篤間遇榮

獨必多方措置俾無凍餒歲大疫製辟瘟丹施病者多所全活子

杲之與子勗近取堂周鄉閭窮無告者亦執中之教也二林居集

顧詒祿字祿百號花橋長洲人進士三典之從孫也太學生一意治

古文取法遵嚴震川而得其醇記序簡峭有致尤為擅場詩亦恬

雅無俗韻沈文慤乞休後詒祿權記室凡應酬之作皆為捉刀詒

祿偉軀幹能言語為人排難解紛有魯仲連之風云

李繩字勉百世居長洲之莊渠後徙郡城曾祖魁春明季諸生績學

厲行以遺民老見長洲志祖汝霖吳縣學生父恕有孝行繩舉乾隆六

年鄉試選雲南恩樂知縣甫一載以病乞休大吏留主五華書院

繩早慧年十二即好為詩沈文愨公見而異之令受業於門既長

遂以詩名吳中平生篤於倫紀其見於詩往往忠厚悱惻得風人

遺意居父憂著倚廬吟感念劬勞反覆盡意讀者無不淚淋漓下

也二林居集

顧元揆字端卿元和人前明給事中九思八世孫父祖望知富平縣

母韓氏名韞玉文懿公萊季女工詩元揆舉乾隆九年順天鄉試

除龍泉知縣調餘姚民有以謀逆告者按驗無迹盡釋之而置誣

告者於法擢南塘通判攝平陽縣再攝淳安會水災不待 奏請

輒放賑臺司駁減銀二千兩有奇至醫居宅償之回南塘任築室

曰吏圃日於其中著書作畫泊如也吏白故事歲一巡視漁斲可

得錢六百緡元揆笑曰汝謂我愛錢耶竟弗往陞羅平州知州未

赴丁繼母憂起補黔西州知州有李某者家鉅富兄弟積橫於鄉

捕之獄李潛饋巨金益怒將窮治之會調古州不果尋卒官元揆

居官不名一錢時時分清俸之餘以贍族人雖盜無儲粟弗顧也

攻制藝根柢六經能詩書學顏平原畫亦入妙

張正國字天球唯亭人父士隆家故貧欲應親族之緩急而力不逮

正國曲承父志雖典揭勿吝平居抑搔扶持寢食必與父俱及父

病痢與妻王氏共侍湯藥雖中冓廁牕必親滌之彌留時父喟然曰子婦如此吾死無憾矣既沒喪葬盡禮墓在戎巷距所居五里

日往展拜風雨無間者三年

甫里志

朱受新字念祖號木鳶吳縣人諸生有木鳶詩稿七言絕句開闢動盪語近情遙頗入唐人佳境惜無旗亭畫壁能賞黃河遠上者

別裁

集

鄭廷暘字嶠谷

或作迂谷

號竹泉又號紺珠長洲人季雅先生子

名鉞見長洲志

書法褚中令小楷尤工銀鈎鐵畫出力藏稜同時如蔣仙根錢襄皆不逮也詩卷無多意到語工自然神妙

湖海詩傳

石年字不齊家赤貧撚金線爲生性耽吟咏從沈歸愚周迂村兩先

生遊兩先生亦心賞之惜天不予年未中壽遽沒其人亦遂無聞予於破篋中得其殘稿若干首今古體俱備其中有蟲寄居一首序云祖居在花橋桐巷之間有堂有亭界以潭水花竹分韻魚鳥相樂得香山池上篇之什一邇年困頓弗爲料理漸次在蔓草中矣僦居親串一椽有半目爲蟲寄居云余家去花橋桐巷僅里許求所爲蟲寄居者邈不可得良足慨矣其兄名映綠號雪巢亦工詩有雪巢吟稿

沙維杓字斗初號白岸張岡字崑南號古樵二人皆居下津橋白號兩布衣皆能詩袁太史枚云斗初花氣半湖陰五字得五言佳境崑南七言亦入中唐佳境王司寇景云斗初隱於商來往江西湖

北間長髯巨顙如酒豪劍客詩亦多悲壯激發之音崑南隱於醫
豐頤紅頰神情怡曠間好古琴詩亦多清和閒適之趣兩人性情
各別而好吟咏則同皆爲吳泰來所契賞嘗刻爲三布衣集
蔣元益字希元號時菴長洲人廉州知府杲之子乾隆十年會試第
一官至兵部侍郎生平有知人之鑒銜命典試拒絕苞苴推轂
寒峻率至通顯江西劉侍郎鳳誥胡撫軍克家浙江翁觀察元圻
皆特拔士也壯歲家居褚學士廷璋尙幼一見輒奇賞之曰是兒
定入清華後其言果驗及歸田主婁東書院識拔李家五子尤以
字蘅塘名錫恭者爲冠曰此子不在吾輩下後亦如其言
惠棟字定宇號松崖元和人硯溪先生周惕之孫半農先生士奇之

子諸生乾隆十六年與陳祖范顧棟高舉經學報罷盧雅兩重其
學延之校書棟最精於易所著周易述王發揮漢儒之學以荀爽
虞翻爲主而參以鄭玄宋咸干寶之說自爲註而自疏之又詳考
漢易宗派源流掇拾緒論以見大凡曰易漢學又考究漢儒之傳
以發明易之本例凡九十類曰易例其餘著撰詳見藝文補志惠
氏四世傳經至士奇而大至棟而精論經術必宗漢魏六朝次之
其於史子諸書亦必取自唐以前六書從說文輔以玉篇廣韻所
著書皆確守古註而疏証之先是東南文士疎於經誼百有餘年
及棟出而古學大昌四庫全書館開悉取其書作爲提要發明
大指然後古經師大儒流傳之緒猶可窺其涯畧也祖父兼精吟

咏瓣香漁洋棟少時克傳家學其後經術日深不復為詩弟子長洲江聲字鱸濤守許鄭之學最堅著有尚書集註音疏釋名疏證說文解義舊音經典文字音同義異辨等書生平不為楷書雖日用簿皆小篆故所刻皆篆書

按元和志棟附父士奇傳此皆志所失載者

黃林字協周元和人少事親孝母病禱北斗求以身代積四十九日方假寐忽聞異香幡幢蔽空下中擁神人如世所肖道姆狀呼其名曰林爾母數盡憐爾孝心當延數旬耳已而果然性慈仁持不殺戒齊門沙河塘暴棺至數千林贖金四百兩瘞之橫山之麓予開近取堂周里中孤寡之窮乏者林與沈浴鯨實助之教授生徒輒盡力人以急告無弗應

二林居集

褚寅亮字搢升號鶴侶長洲人乾隆十六年召試舉人官刑部員

外郎少以制義名中年覃精經術宗惠氏之學一以註疏為歸三禮折衷賈孔九通喪服時公羊何氏學久無循習者惟武進莊侍郎存與默會其解而寅亮能闡發之世稱為絕業假歸主常州龍城書院羣經咸有論撰惜未刊行

朱楷字孔林長洲諸生少與惠棟交故性耽墳典又與長洲布衣余仲林蕭容校勘註疏惜未成書

徐堅字孝先號友竹貢生襟情高曠居光福里

隨園詩話誤作洞庭山人工隸書

喜篆刻尤長山水幾入麓臺之室游楚南依陸朗夫者二年時朗夫貧且病堅盤桓不忍去至護其喪而歸世因此益重焉詩多清

雋之旨往往吟諷不能置年至八十餘乃卒

以上三條
湖海詩傳

彭績字秋士初字其凝長洲人明貢生行先四世孫

行先
見志

父景騏修

長者行績少端植如偶人長而耿介不蹈非禮意所不可雖千金

弗屑也與人落落或竟日不發一語然其所敬愛寤寐歌思無少

忽置嘗一應縣試喧沓中斂手視日景遂投卷出自是絕意科舉

而并力為詩其詩精靈超變不可方物未嘗數數為文然有作輒

工尤長於紀述嘗自敘而繫以贊曰飽喫猪肉童心來復不尤隻

翼不怨偏轂囊無豪餘瓶無撮粟光潔一身浩然萬足族子紹升

聞而歎曰先生其知道矣乎績早歲喪父壯益窮母妻相繼沒賣

屋以葬寓木主僧舍家具蕩盡獨攜先世遺書二簞轉徙無常居

無何病卒其卒也客外生張豹文家豹文為治斂族人立其再從
子以成為後以遺書二簞昇之

孫泰溶字學成祖振自崑山遷於郡城父鼎鐘以孝子旌早卒

見母
志

陸氏亦以節婦旌

見長
志

泰溶平生所學不務空言一以生人為心

嘗徧歷四川陝西湖南江蘇諸幕府所至必訪求民間疾苦既得

實若疖瘍在身必速去之為快其於救荒一事尤竭誠無隱憾性

最孝家失火逼母寢泰溶躍起突煙燄人負母出晚集經驗方采

藥草為丹餌施人多奇效贖放禽鳥魚鼈之屬以五六萬計乾隆

五十年卒

汪縉字大紳祖懋琳自休寧遷於蘇父元儵早卒母程氏以節婦旌

見元和志縉吳縣貢生一意治古文覃思奧蹟游刃百家積滿而流沛然無阻里人沙維杓見其枯題等作曰此老杜先天詩也嘗主建陽書院以正學道諸生已而歲荒輟講歸教授里中生平志趣殆不可測嘗作無名先生傳云先生講學不朱不王先生著書不孟不莊先生吟詩不宋不唐先生爲人不儼不狂先生處世不圓不方一子殤立從孫玉藻爲後所著書紹升皆刪而存之

以上三條並二林居

集

彭紹升字允初號尺木晚號知歸子又自號二林以高忠憲劉遺民兩先生修學地同名東林也長洲人尚書啟豐第四子乾隆二十二年捷南宮遂以名進士終於家紹升生長榮華脫屣富貴歸家

後屏除妄念專修淨土其言曰孟子云形色天性也知形色之爲天性則不容離土以言心知天性之爲形色則不容外心以求土離土以言心是以天性爲有外也其所謂心一塊然者而已矣外心以求土是以形色爲有外也其所謂土一塊然者而已矣是皆不明乎踐形之說者也其洞澈內典如此四十九年丁父憂殯葬畢閉關文星閣不復與聞家事至嘉慶元年作辭世偈跌坐而逝平生著述頗多意主闡揚淨業所撰居士等集使讀者咸有樂郊安養之美至舉善會以周貧乏曰近取曰潤族曰惜嗇曰放生亦本釋氏普濟衆生之意也古文宗法震川詩亦克承家學妻費氏亦長齋奉佛無子

乾隆五十年吳中大饑公廉知吳縣之浦莊被災尤甚計口給錢全活甚衆浦莊爲余故鄉至

今猶尸
視之

過春山字葆中吳縣諸生與沙維杓吳泰來朱楷張岡諸人為友詩

宗王孟韋柳澄鮮幽逸妙悟天然自出清襟不由襲取沈文愨公

採入別裁集中春山博通羣籍尤精於新舊唐書嘗為補遺糾誤

惠棟極稱之未及成而卒年纔二十九

湖海詩傳

程廕桂字燕山號臨川元和人以仁和籍登乾隆二十四年順天鄉

榜除四川大竹知縣三十八年將軍溫福進剿金川召詣幕府六

月初四日廕桂解餉至美諾遇金匪大至奮身格鬪死長子烈隨

侍行間亦抗賊不屈死廕桂性廉介不名一錢當軍與文移絡繹

不以絲粟累民身後囊橐如洗真川中良吏也死忠死孝大節萃

于一門斯亦難矣

上聞贈兵備道入昭忠祠

蜀中又建慰忠祠於少陵草堂之西

以七月十六日奉主入祠都御史吳白華詩云慰忠祀江城昭忠祀京邑

陰其次子煥入監讀書越六

年擢用知縣

煥字其章由知縣擢知州尋以事罷

吳總憲省欽慰忠祠五古可作詩

史惜篇幅甚長不能備錄中云角礪檄報同科多火攻合鍾程暨

仙尉望救痛何及鍾名邦任仙尉謂許濟程卽廕桂

是役也六月

邊將軍殉難昔嶺者則有戶部主事上海趙文哲刑部主事無錫

王日杏重慶府知府新建吳一嵩知州承德常紀知縣陽湖徐瓚

吏目宛平羅載堂初二至初九等日糧站各員被害者則有府同

知桐城鍾邦任通判休寧汪時知縣程廕桂父子巡檢臨桂郭良

相典史光州吳鉞東安許濟初十日以後從督臣登春退師途次

遇害者則有刑部主事滿洲特音布候補知府江寧王汝玉通判

浦城吳景知州會稽吳璜漢陽徐諭南昌彭元璋知縣渭南張世

永嘉善許椿宛平孫維龍貴筑章世珍布政司照磨臨榆倪鴻縣

丞仁和倪霖典史寧河周國衡以上凡二十六人俱入慰忠祠又

吳門補乘

卷五

人物補

完

如法殲賊十許羣賊鬻之自軍中來者多傳其事督臣查明奏

上得

贈道銜自程君外皆非吳產附識於此以示景仰

薛起鳳字家三吳縣人乾隆二十五年舉人少孤依其舅比邱廣嚴廣嚴隱於卜得錢資起鳳從師問學起鳳問師訓輒領解性孤冷非其意所深契終日相對無一言遇同輩議論灑灑不少休家雖貧能急人之困有師周鹿原老無依資之入支硎山卒為斂葬焉其姊家負人百金將沒前數日出金為盡償之人尤以為難居常好為詩思深味隱耐人尋索既沒其友彭紹升錄其稿刻之

吳泰來字企晉號竹嶼長洲人乾隆二十五年進士二十七年召試賜內閣中書泰來意致蕭閒才情明秀有別墅在木瀆日遂初園其中藏書數萬卷多宋元善本日與江浙諸名流為文酒之

會作詩一本漁洋吳中數十年來自沈文愨公外無能分手抗行

者中年自定其稿為視山堂集十卷惠棟序之餘稿皆藏於家

湖海

詩傳

褚廷璋字左莪號筠心長洲人少稟異質乾隆十八年拔貢授太和

教諭二十二年召試賜內閣中書充方畧館纂修于準夷回

部山川風土最為熟悉奉敕纂西域圖志書成賞緞二匹接

纂西域同文志并通等音字母之學二十八年成進士選庶吉士

授編修累遷侍讀學士尋降六品銜母憂歸僦居崑山未幾卒廷

璋以文章受主知三典省試四校禮闈四年學使所至以得人

稱奇中丞豐額熊方伯枚皆出門下詩初學青邱既學元白書法

出入右軍大令間性好推解姑適顧姊適高孀居無依攜養京邸故人顧虛齋窮而來歸生館死殯不少吝其厚德類如此

蔣曾榮字震牧元和人至性父子宣病肢體卷曲中夜含淚拊摩跪中庭願天求代風露所侵得濕氣病又迎醫至數百里外觸炎暑犯霜雪如是者數載竟以瘵疾卒

張填字商言號瘦銅吳縣人乾隆三十年順天舉人官內閣中書詩才橫厲硬語獨盤後乃學於山谷后山沿於文長中郎生平與翁學士方綱趙太守翼友善故考證金石及書畫題跋詳贍可喜

詩傳

錢近仁長洲人其先世不可考父母早喪貧不能自存寄食攻皮家

遂習其業少長與塾中兒遊漸能識字工作外讀書日夜不輟苦於無書乃徧歷書肆及古寺院為之傭不取值因得借觀羣書積四五十年凡經史子集九流百家流覽幾徧尤致力於孝經論語人稱之為補履先生性樸訥不妄取一錢嘗於道上拾遺金數餅待失金者至還之所居老屋半間貯破書萬卷無几榻鍋釜之屬彭進士紹升汪孝廉元亮過之歎為沈麟士一流人乾隆壬子春饑餓不能出門戶王茂才丙迎至家臥病百餘日而卒年七十有六無子郡中士大夫謀葬於虎邱西麓汪稼門先生題其碣曰錢處士墓嗚呼處士亦庶幾不朽矣

許寶善誌墓

張玉穀吳縣人工古風尤長樂府有義婦袁氏因夫作竊勸之不從

乃沈水死玉穀作詩弔之其事其詩俱足千古又袁鉞號青溪諸生善醫工書詩多自適不落古人家數徐緒字徵園貌短小終日以酒一壺杜詩一卷自娛此外不知有人間事程鐘字白山鬚眉清古所居曰逸園在西磧山下爲名勝地妻號生香居士夫婦能詩張琦字映山生平不甚讀書而工作韻語皆玉穀同里詩人也

集隨園詩話四條

○白山一字在山

顧宗泰字景嶽一字星橋元和人乾隆四十年進士爲諸生時試輒冠軍與吳縣諸生劉潢齊名家有月滿樓文酒之會無虛日袁太史枚云詩才清冠等夷海內知名之士無不交投縞紵今之鄭當時也官至高州知府罷歸

潘凱字倬成吳縣人乾隆二十一年舉人官臺灣淡水同知五十年

十二月二十一日內山生番直加未南社與日懷社在山射獵過樹木隘口殺守丁三人追餘人入界內適凱自鄉治獄回夜抵老衢崎嶺外火光人聲遙相逼乃停輿徒步率役夫三十二人奮力往禦帶刀者僅六人值路險月黑番衆蟻聚遂遇害役夫被殺者十三人盡割其頭去明年三月事平得凱頭於直加未南社面目如生甥彭世燧啓棺合諸尸身殯僧寺事 聞 子恤如制無子

以姪蔭

餘姚沈謙二社行臘殘月黑磷螢飛朔風獵獵來豪豨海水轟立上岡脊毒霧直欲遮崔巍河陽司馬老任劇左車

無牙頭雪白衝寒治獄宿中途夜半公回封印迫狼子野心忽跳梁突入隘口戕丁役火光明滅聲譁呼停輿徒步直前逆陂陀礪犖沙石頑路暗林昏當隘窄隸也力竭可柰何空拳白手兩相扼可憐頭顱血模糊道上行人間老衢官一輿臺十有三相從地下

無頭顱偏野惟餘好身手參橫月落驚啼鳥九原有恨終臣節一
 路吞聲哭大夫觀察聞警赫然怒總戎整旅星夜赴老謀持重出
 萬全不肯一擲輕孤注觀察永公福密委諸羅徐二尹英先赴淡
 得內山形勢定計進兵徵兵賈勇祇經旬後壠中港旌麾駐前茅
 後勁聯中權剋期進山分兩路疊嶂層巒高復下潛伺瘳狗能多
 寡跣足裸體毛髮蓬面目如人成久假光皮通事名通譯報凶愆
 直加未南目懷社糧持五日路干盤穿林飛箐無需馬舍生負氣
 忍全誅下令惟求殺人者蠢爾無知猶崛強愍不畏死橫螳螂伏
 弩齊發左右翼引槩直入前後行牽頭係頸斷腰膂二十六級懸
 長槍追奔逐北中鎗箭顛仆崖谷尸悉僵正月十七日官兵兩路
 進山分剿十八十九兩日斬二十六級中鎗箭跌落死者二百餘
 人尸填澗壑蘊山觀察溫而栗除惡務盡不容逸重中軍令再誓
 師深入其阻須隼疾短兵相接番尸橫直加又五日懷七二十六
 歸化番名間道號吡走小鸞男婦大小巖洞攢緣崖攀木官軍到
 雷轟電激飛彈丸蓋粉骨肉醜類絕二社餘孽從小把鸞社逃入
 遠山二月初九日官兵窮追痛剿死鎗炮者六七十名其餘滾墮
 溪澗就殲無遺惟聞山鬼嗚悲酸大快人心伸國法軍容整肅
 軍聲歡同時城守皆能事孫太守丁協臺畱守臺郡城竹塹臺防
 董司馬調守塹城三灣鎮道駐兵處分要地抽兵掃穴盡犁平初

八初九兩日鹿港長司馬搜目懷社署淡防程大令搜直加未南
 社破巢到處窮標識遊魂血汚痛無歸共得頭顱一十四從役頭
 顱日懷社得五顆直加未南社得八顆並得潘司馬首皮肉尚未
 化覓子尋爺婦哭夫皮肉脫落難姓字河陽之首獨巍然雙目未
 瞑猶含淚生前齒豁僅存三存右邊上牙一下齒二鬚髮稀微無
 少異道路爭傳識故侯焚香羅拜接踵至渭陽痛絕死復蘇謂彭
 塲啓棺合殯城南寺二月春深天氣氳樓船夜渡飛將軍制府運
 籌神遠畧長白雅公保軍門力疾宣勞勤海澄公黃仕簡更得柏
 臺持大體仁嚴兼施靜不勞再搜再捕力愈猛口救如雷息信信
 自古用兵貴神速搏兔亦同搏象云四山昨夜雨滂沱天錫甘霖
 一洗戈可知天意即人意賞功罰罪無偏頗九重恩寵眷勲舊
 三月初一日海澄公恩加宮保銜一時文武蒙溫和仗義守節
 乃志士又奉 上諭潘凱與卹典有備無患斯凱歌咄哉二社胡
 自何用長繩繫花項歲午月辰日上巳旌纛飄揚臨鹿港又按
 陽湖趙翼 皇朝武功紀盛凱方在署忽報城外有無名尸當往
 驗甫出城卽爲人所殺并胥役織焉當事者不能得主名則詭以
 生番報謂番性嗜殺途遇而戕之也使人以酒肉誘番出醉而掩
 殺之奏罪人已伏法而殺人者實脫然事外事與此不同未詳孰
 是然甌北僅得諸傳聞不若望庵身行間目擊其事之足據也
 此詩具詳本末潘之殉節確鑿無疑故特附錄於此以備攷核庶

幾忠義之不至泯滅云歐北翼別號望庵謙別號

錢棨字振威一字湘齡長洲人高祖中諧官編修載吳縣志棨專志舉子業夜讀率至五更應童子試輒不利至乾隆三十一年始補長洲學生縣府院皆第一時有小三元之稱厥後六試棘闈不得售志益銳文益純而境益困至四十四年始舉鄉試第一先是座主謝少宰埔夢神人授巨筆上有經天緯地四字飾以孔雀毛光燄奪目覺而得棨卷遂置解首四十六年會試殿試皆第一御製三元詩紀瑞座主贈詩有千古第七人之句我朝開國以來三試第一者棨一人而已除修撰父憂起上書房行走充三通館纂修武英殿分校五十四年充會試同考官拔錢楷李鈞

簡龐士冠皆知名士後皆位卿貳五十九年充廣東副考官轉侍讀侍講尋充日講起居注官陞庶子嘉慶三年大考入優等陞侍講學士轉侍讀學士充雲南正考官出闈奉提學之命四年補內閣學士兼禮部侍郎是年八月卒於滇年五十八棨事親孝持躬介親病割股以療通籍後權貴欲羅致門下屢使人諷意卒不往人以此益重其品

張邦弼字清臣一字補梧其先不知所自出或云本浙之海鹽人父成隆徙吳中樸訥寡文操小業自給邦弼敏慧絕倫六七歲時詣里中師授讀琅然如夙誦十五歲補長洲學生文學籍甚乾隆四十五年舉於鄉明年會試下第以母老歸自是得疾五十二年力

疾上春官復被斥歸中途病劇至家而沒邦弼於制義非所甚嗜
獨注力於詩吳中士大夫亦以詩重之未第時贈詩袁太史枚云
籃輿款款赴清涼夾路松花間稻香一院青山人不見飛來嵐翠
滿衣裳著有詩集已刻若干卷未刻若干卷

殷如梅字果園元和諸生安貧樂道苦節自貞簞瓢屢空嘯歌不輟
蓋錢穀居節一流人也詩有半畝瓜壺秋色早一庭梧竹雨聲多

雨中花鳥都無賴病後詩文儘放低等句置之石湖居士集中孰
能軒輊湖海詩傳一字羽調咏桃花云望去分明臨水岸開殘容易逐楊

花咏梅云自是歲寒松竹伴無心要占百花先隨園詩話

王金增字師李東洞庭山人文恪公從兄盤之裔長洲諸生有聲巒序乾隆四

十九年省試下第肄業鍾山書院與南豐湯椿年輯書院志又手

校韓昌黎全集楊誠齋錦繡策先世有栖隱之地曰壑舟已迷其

處金增卽朱氏廢園改建賦詩十章廣徵詞人和之園中藏書

數千卷題曰曾寄東山王某處蓋不敢自予也生平孝弟輕財重

義死之日有聞而泣者足徵集參墓誌墓表兄奕經字九如嘗見人竊物急

遙避之未嘗以姓名告人拾路上遺金俟其人至還之不受謝其

厚德率皆類此墓表弟奕組字九錫重修宗譜創建家祠捐金以新

山中節烈祠遇歲饑爲粥以與鄉之餓者唐琦傳蔣元益誌墓合纂子世錦字

再陸工於詩少從沈歸愚先生遊官嘉峪關巡司政事之暇不廢

吟咏著有藝芸館詩鈔十二卷刻苦挺拔師法杜陵人以爲有父

風云行畧像贊合纂奕組子世鈞字禹載進賢縣丞其在家也承父志以

輯世譜為守節父妾請旌族人子有隨母改適冒他姓者為之

贖還承祀釀錢以修石橋村街路修祖塋碑碣之將圯者其在官

也為棉衣以衣獄囚置茶亭以憇行旅作池館於丞廨以與文人

相眺咏人亦以為有父風云墓誌

王如松吳縣人年四歲父病不食亦不食時於中庭俯伏人問其故

曰吾顛天祈父速愈耳人以此奇之父浩故充吳邑書佐性不能

詭隨乾隆五十八年冬十二月以公事枉被摧辱憤而自裁如松

時年十四號慟搶地亦闔戶自經死蓋父死于申子死于酉相距

纔一時耳太守馮公鼎高為立祠額之曰穉齡血性嘉慶十一年

請於朝建坊於虎邱之後山潘奕雋傳

王煦字陽孫進士岱東之子吳縣諸生乾隆四十八年秋赴省試過

句容縣便民河時河甫浚江水大至棺之漂於水者纍纍然殆千

百計遂畱其地擇高原葬之至歲暮始竣事五十年吳中旱多饑

殍有挾詐者煦訴之縣榜示給棺免驗存沒胥安明年夏疫作病

者藥之死者瘞之觸暑奔馳不辭勞苦凡諸善舉皆取貲潘文起

而與其友吳鐘協力圖之故事無不濟鐘字魯尊長洲諸生動必

以正喜讀儒先語錄粹然古君子也文起號青橋元和人一生篤

於為善不吝財不好名不責報建義莊於混堂里以濟族人值歲

饑助賑二萬金授中憲大夫

沈中旭字啓白吳縣人少豪宕急人之難既而以醫名益好施貧者不取藥直或反與之錢粟年二十五喪偶不復娶

楊廣文字道原吳縣人少孤不娶歲饑道有棄兒輒收養之至十數長而後遣之門有乞者令唱佛名即與之錢由是乞者踵至

姜見龍字元標吳縣人嘗倡設義家埋諸暴骼歲饑捐金以賑家遂

中落習眼科以自活

三條二林居後集

江大林字環溪其先自歙來徙遂爲吳縣人大林性純篤父病減已算以禱旋瘳母患瘍楚甚日跪舐之輒痂脫人咸稱異父恣好施

予大林承遺命置長稔田立義莊並買地爲貧族聚葬嘉慶二年

卒十九年

旌孝行吳祭酒錫麟誌墓

互見義局補

王瑚伯字越珊明文恪公整九世孫也居尹山家貧始佐人爲賈意不樂已而爲舅氏宋子遷主會計益不樂外兄窺其志爲致童子數人俾授句讀瑚伯喜曰是吾心也遂習舉子業補吳縣學生生平修謹躬孝弟之行束脩之入輒以奉親親疾脫衣質錢供湯藥匿不使親知年三十始娶娶一年而歿

彭紹升傳

王翼孫字以燕一字聽夫長洲縣人明大學士諡文恪諱整者其十世祖也官襄陽呂堰驛巡檢嘉慶元年三月賊起襄陽之黃龍嘴蔓延旁近翼孫募鄉勇爲守禦計未幾賊至出迎擊擒斬劉方達劉漢德陳起蛟三人飛狀上大府告急翌日賊大至度不能守慨然曰死矣爲書別父兄付弓兵劉祿且令詣解取印上郡守祿去

未百步廨舍火起翼孫持短兵據大橋賊來奪橋翼孫連刃數人
 賊眾奮長矛環刺翼孫受重傷跳橋下水中賊鈎出翼孫罵不絕
 口賊益怒爭斫殺之仍投尸橋下賊退故吏廖之義於橋下求得
 死時所著衣上之縣後於俘賊俞宗武手獲呂堰巡檢司印勘宗
 武始悉死節狀自翼孫死賊過呂堰無不顛敗若有蹟之者輒驚
 曰此巡檢君之靈為立廟羅拜乃去或曰遺骸亦賊所營葬事

聞特旨照縣丞例議卹入昭忠祠 賜祭葬予世職如制 袁枚誌墓

洪亮吉石表。嗣子嘉福承襲雲騎尉。附錄翼孫禦賊章程八
 條一臨陣奮勇以期必勝一凡鄉勇十名設頭目一人頭目十人
 設總頭目一人各相鈐壓統於巡檢司一附近小村單丁弱戶皆
 遷呂堰鎮其丁壯俱充鄉勇赴營守望一設哨探一定功過以昭
 激勸一儲軍食一禁遷移除鄉勇外居民各安耕種毋聽謠言
 輕去失業一鄉勇在營守望各相團習技藝不得飲酒賭博

顧鈞字荀皆居白塔子里九世祖前明給事中九思墳在黃埭為墳

丁浦二所侵浦故積猾族人皆束手鈞獨訴之縣而窮治之乾隆
 五十年吳中旱流離載道鈞惻然曰彼不食吾能食耶於是鬻家
 具且揭債為擔粥與里之餓者擔粥者濟粥廠之所不及也凡老
 幼廢疾不能就食於廠者則食之其法創自鈞後遂有踵而行之
 者

顧孩良字九齡吳縣人九歲遭母疾且殆藥不效孩良嘗從鄰家賃
 薙髮刀割肱肉置鐺中湯方沸母呼湯急遂傾鐺中以進母飲之
 盡而孩良袖間血漉漉出母驚問故以實告母病遂起無何孩良
 以家貧隸樂部逐隊至安慶按察使王■聞其割肱事出金八

十兩贖之名與字皆王所命也館之衙齋令從師讀迎其母養之
居三年奉母歸歸而讀不輟入平江書院太守與同官醵金二百
五十兩以其息贍母朝夕復屬縣為買屋居之孩良質固良且有
志趣肯讀書平掌教聖臺賢之朱學士珪尤亟稱其孝云

曹鴻書
記參二

林居
集

沈棟字宇寧號東田長洲貢生每試輒居高等詩瓣香放翁意有所
觸而以談笑出之皆成名句如雜記所錄擊柝行之類是也讀書
余家為王茂才銓上足嘗題余齋壁云雪泥鴻爪記分明卅載重
來百感生翠竹碧梧無恙在應還識我讀書聲又題浦莊村居圖
四絕蒼茫何處著吟身夢裏扁舟笠澤濱喬木數株田幾稜舊時

門巷記來真人煙暖曖古村墟山可樵兮水可漁縱使向無廬舍
在也應料理一椽居百年重款子雲亭入座翛然野鶴形究竟是
賓還是主擡頭一笑問山靈忽憶吾家舊草堂卅年寥落在江鄉
往來怕指旁人認門戶欹斜半夕陽

自註舊居唯亭每扁舟
過之輒不禁悵悵也 皆清

雅可傳而湖海集竟未之採殊可惜也著有稻香樓詩稿竹香樓
存稿亦未刊行於世

附錄

明朱紉巡撫浙閩窮治海寇忤貴人意落職聽勘慷慨作俟命

詞 萬劫羣凶獨立孤踪八疏軍功十疏迂忠一官早辭一命莫
容浙閩之機械則巧宵旰之緩急誰庸蓋以海為利之家布
列顯要故以是為非之口充塞鴻蒙披腹經年正懼多讒之險
乞骸請老敢干不韙之公日月在天雲霾在地便宜敕旨遂成

文具旗牌軍令遂成兒戲世昧誰開黨同伐異知責人以常法
不念呼吸之兵機知論事以常情不念順逆之名義知一時賊
命之當惜不念累年赤子之倒懸知一時威柄之當收不念累
年冠履之倒置知坐計以旬月不念先奏福寧得報云云相去
漳州千里知遙制以文墨不念先奏福寧得報云云實為天閣
萬里變虞倉卒孰非督陣之時事繫機宜未奉班師之旨九十
六執訊之醜若云可矜若云可疑數百千航海之家何據而作
何據而止茲幸指揮粗定大開報復之門向使反側四起必樹
激變之幟根復尙爾公行激變固當上文致不然開府職掌參劾
何姦先悉見彌縫極口條陳利害何上下曲為壅蔽屠戮朝貢
夷國謂非叛臣謀殺寧波巡撫謂非怙勢鄭世威未奉復職之
旨布置陞遷張德熹顯犯通賊之私頤指營衛惟功惟忠為仇
為厲作福作威孰大孰細且內外錄囚應死尚多撫拾之詞今
薦紳為賊前驅孰無迎合之弊會議如此支吾主者得無牽制
盡刪原奏之要全為佑賊之計既非賊曷慮不靖既行勘曷煩
告示既慮變易不體念當事之人既佑賊曷不早寢開府之議
軍門未撤占風之月無波勘使未來偽府之船已熾開刀至於
開胸豈法所許殺人至於殺官何詞可諉將官人之命輕於叛
賊抑天子之法輕於勢利前此一年臣奏九重固曰不死盜賊
之手必死筆舌之鋒斯言既驗俟命為恭亂日糾邪定亂不負

天子功成身退不負君子吉凶禍福命而已矣命如之
何丹心青史一家非之一國非之人孰無死惟成吾是

吳門補乘卷五


吳門補乘

卷五 人物補

三

吳中補遺

吳中補遺



天保二年

天保二年

